

**NATIONAL ASSEMBLY OF
SEYCHELLES**

Friday 3rd November 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou dimoun. Bonzour nou *staff* Lasanble, nou bann Manm Onorab, nou piblik ki pe swiv nou deor. E mersi pou zot partisipasyon dan nou Biznes Lasanble ozordi.

Avan nou al dan nou Biznes ki lo *Order Paper*, mon ti a kontan pran zis detrwa mo lo lapar Lasanble pou rann omaz Per Gustave Lafortune, ki pe ganny antere ozordi.

E byensir pou prezant nou kondoleans pou son fanmir ek son zanmi dan kominote Anse Boileau, kot i ti pret laparwas dan sa bann dernyen lannen, e osi tou dimoun kominote Katolik dan Sesel; tou dimoun ki konn li.

Mon krwar nou pe rann omaz ozordi, se devouman en Seselwa pour en koz ki gran; ki pli gran ki nou lenter

personnel. E sa lespri sakrifis, sa lespri donn ou lavi pou en koz, se sa mon krwar ki nou pe rekonnet dan lavi Per Lafortune.

E lo lapar Lasanble, byensir nou rann omaz *leadership* dimoun parey li, ki'n devoue son lavi pou lakominote Seselwa. Mersi pou siport sa lapel.

Nou pou pran lo *Order Paper, Bill Appropriation Bill*. E mon a demann madanm raporter pou apel Minis pou zwenn nou silvouple.

Bon, bonzour Minis Naadir Hassan – Minis pour Finans, Plan Nasyonal e Komers, e egalman bonzour son bann zofisyé – Mr Patrick Payet Sekreter Deta dan sa Minister, Mrs Astride Tamatave Kontroler Zeneral, e Mr Jude Commettant Asistan Kontroler Zeneral, zot tou bann figir ki'n vin ase familye dan Lasanble.

E byensir zot pe zwenn nou ozordi pou konsiderasyon *Appropriation Bill, 2024*. E avek sa mon a demann Mosyon pou *Second Reading*.

HON BERNARD GEORGES

Bonzour Mr Speaker. Bonzour Minis avek ou delegasyon. Bonzour tou bann koleg Onorab, e tou dimoun ki pe swiv nou dan lakour.

Mr Speaker, anba *Order* 69(2) nou *Standing Orders*, mon *move* ki the *Appropriation Bill*, 2024 i ganny lir en Dezyenm Fwa. Mersi.

MR SPEAKER

Mersi. Mon a ganny segonnman? Onorab Arissol?

HON SANDY ARISSOL

Bonzour Mr Speaker. Bonzour Minis avek ou lekip; bonzour Manm Lasanble Nasyonal, bonzour tou dimoun ki a lekout, Mosyon i ganny segonde. Mersi.

MR SPEAKER

Mersi. Minis, avek sa mon ava envit ou pou fer ou prezantasyon sa *Bill*.

MINISTER NAADIR HASSAN

Mr Speaker, Onorab *Leader* Lopozisyon, Onorab *Leader* pour Zafer Gouvernman; tou Manm Onorab, Ser e frer Pep Seselwa, bonzour.

1. Lentrodiksyon:

Mr Speaker, sa Bidze i katriyenm ki sa ladministrasyon ki ti vin ou pouwar an 2020, i prezante. I enportan note, ki sa ladministrasyon ti vin o pouwar dan moman ekonomik pli difisil dan listwar sa pei.

Dan sa konteks, sa i fer tou sa ki nou'n reisir akonplir pli remarkab, kot nou'n kapab vir en sityasyon potansyelman katastrofik e retourn pei a son normalite, e menm fer pli byen avan sa kriz pandemik e ekonomik.

Sesel ozordi i ganny war koman en sikse ekonomik lo nivo mondyal. Sa i montre sa travay formidab, ki sa tim ki zer sa lekonomi Sesel in fer dan sa 3an. Mon oule dir mersi mon tim zenn profesyonnel, ki tou i Seselwa, kot mon Minister pour sa bon travay.

Koman en pep osi, nou'n war ki mannyer nou enn ki determinen, rezilyan e kouraze e nou devret fyer ozordi, sa semen ki nou'n traverse avek sikse.

Mr Speaker, travay sa ladministrasyon i kontinyen. Nou'n fer bokou, me i ankor annan bokou pou fer, pour nou reisir satisfè laspirasyon nou pep. I reste ankor bokou pou aranze e bokou pou transformen dan sa pei.

Mon krwar nou tou nou'n realize, ki sa transformasyon ki nou oule war pa pou ariv dan 3an, me i en parkour a lonterm.

Alors Mr Speaker, sa Bidze 2024, parey monn dir dan lepase, i en kontinyasyon en program lonterm sa

ladministrasyon pou amelyor sityasyon ekonomik e sosyal sa pei e son pep.

La baz pou fer sa, se en transformasyon ekonomik ki ava kree plis larises, savedir pou enportan pour nou kontinyen ek nou bann polisi ekonomik.

Sa i enkli; stabilite makroekonomik, en lanvironnman pli konvenab pou fer biznes e diversifikasyon dan nou bann diferan sekter lekonomi. Sa Ladministrasyon i krwar dan leve debourye. Pour nou pep kapab leve e debourye, nou bezwen kree sa lanvironnman ideal pou siport zot laspirasyon.

Pli tar, Mr Speaker, mon a donn plis detay lo bann mezir ki pou ganny pran dan sa direksyon. Mr Speaker, lavi sitwayen dan lakominote i osi en laspe enportan dan byennet nou pep e nou pei.

E zisteman, i pour sa rezon ki sa lannen, Gouvernman ti vizit tou le 26 distrik, pou ekout bann konsern ek lopinyon nou pep. Nou'n ekout zot defi, ki zot pe fer fas avek toulezour dan zot kominote.

Depi sa bann miting, in annan bokou aksyon ki'n fini ganny pran, e dan Bidze mon pou anons bann lezot sipor

avek bi ede amelyor lavi bann zabitan dan kominote. Sa, i pou vin enn bann gran priyorite pour sa Ladministrasyon.

Pou amelyor lavi nou sitwayen dan lakominote, nou rekonnèt ki nou bezwen osi anmenn en lalit serye, kont bann fleo sosyal.

Mr Speaker, Sa i osi reste enn nou priyorite. Bidze 2024, pe investir dan program ek lenfrastruktir, pou ede siport bann ki pli dan bezwen. Pour nou arive annan en pep ki rezilyan, for, e ki travay dir, nou pou bezwen investir pou konbat sa bann fleo.

Mr Speaker, zis parey in leka dan sa bann dernyen Bidze, lenvestisman dan lenfrastruktir nou pei i pou reste en lot priyorite. Dan sa enn Bidze bokou lanfaz in ganny mete pou refer nou bann lenfrastruktir sportiv.

Parey zot o kouran, Sesel pou akeyir zwe *CJSOI* an 2025, e si nou pa fer sa lenvestisman la, sirtou, anvi leta nou bann fasilite sportiv, nou pou dan problem.

Mr Speaker, Bidze 2024, alors pe met lanfaz lo transformasyon ekonomik, donn sipor bann ki bezwen, e kontinyen investir dan lenfrastruktir pei, ki pou siport

lagrandisman nou lekonomi e nou pep.

Me tousala, nou toultan bezwen reste vizilan anver nou vilnerabilite avek bann sok lo nivo mondyal.

2. Devlopman lo nivo mondyal:

Mr Speaker, devlopman lo nivo enternasyonal pe montre ki lagrandisman lekonomi mondyal pour 2023, pour selman 2.7poursan, en poursantaz ki pli ba ki bann mwayenn lepase ki ti anviron 3.8poursan. Rezon prensipal pour sa ralantisman i konm swivan:

- ralanti dan sektor servis dan bann lekonomi pli devlope,

- Polisi Monneter ki pli sere aköz lenflasyon ki par lao target dan bann pei devlope,

- lekonomi Lasin ki pa pe agrandi o si vit ki ti'n prevwar,

- sa lager ant Ikrenn ek Larisi,

- e la tou dernyerman konfli ki pe annan an Mwayenn Oriyan.

Mr Speaker, si sa konfli i agrave e propaze, lenflasyon lo nivo mondyal pou kapab vin pli pir ankor, prenan kont pri karbiran ki kapab ogmante. Sa nouvo konfli, i kapab enpakte lo Sesel direktman, anvi la kantite touris Izraelyen ki'n vin Sesel dan lepase.

Son lenpak pou endirekteman osi, ler ou konsider bann lenpak ekonomik negativ, ki pou annan dan bann Marse Eropeen, ki nou marse touris prensipal.

Mr Speaker, an 2024, in prozekte ki lekonomi mondyal pou ralanti plis ankor, en mwayenn 2.5poursan. Lo kote lenflasyon, Fon Monneter Enternasyonal pa ekspekte ki sa pou retourn lo en nivo normal ziska 2025.

3. Sektor Monneter:

Mr Speaker, pandan 2023, Labank Santral in mentenir en Polisi Monneter akomodativ, pou siport lekonomi domestik, ki pe fer fas avek lenpak bann devlopman eksteryer.

An mwayenn, to lentere lo bann 'saving' depozit ti 1.50 poursan an Out 2023, e 9.62 poursan lo bann fasilite kredi. An sa ki konsern *Treasury-bills*, to lentere an Septanm 2023 ti 1.33poursan, 1.42poursan e 1.95poursan lo bann fasilite 91zour, 182-zour e 365-zour, respektivman.

An zeneral, in annan en ogmantasyon dan lakantite kredi ki'n ganny donner an Roup, e ki'n al anver sektor prive pandan 2023. Sa i reflekte en amelyorasyon dan

aktivite ekonomik e en lanvironnman pli favorab pour bann biznes.

An Septanm 2023, lakantite kredi in ogmant par 13poursan konpare avek Septanm 2022.

Sa, i en siny pozitiv pour nou lekonomi.

I enportan note ki lensertitid relye avek bann tansyon politik dan lemonn, i kapab enpakte lekonomi domestik lannen prosenn.

Alors, Labank Santral pou kontinyen pran kont bann faktor domestik e eksteryer ler i fer desizyon, pou fer sir ki son Polisi Monneter i anliny avek son bann lobzektif.

4. Lenflasyon:

Mr Speaker, nivo lenflasyon in desann depi Me 2023, konpare avek 2022. Sa i an rezilta en apresyasyon dan valer rounpi, moderasyon dan pri komodite ek karbiran lo marse enternasyonal, ensi ki rediksyon dan kou transportasyon maritim mondyal.

Statistik ofisyel in montre ki konpare avek Septanm 2022, to lenflasyon ti negativ 2.5 poursan an Septanm sa lannen. Lo en baz douz mwan, to lenflasyon ti 0.3poursan pandan sa menm peryod.

An vi bann risk asosye avek ogmantasyon dan pri komodite e karbiran lo marse enternasyonal, ensi ki lekspektasyon ki pou annan plis demann dan marse domestik relye avek aktivite ekonomik, to lenflasyon i ekspekte pli o dan kour term.

5. Sekter Eksteryer:

Mr Speaker, bann estimasyon preliminier, i montre ki malgre ki balans '*Current Account*' ki rikord valer tranzaksyon ki Sesel i fer avek larestan lemonn, i reste an defisit an 2023, in annan en amelyorasyon konpare ek 2022, kot in sorti 8.0 poursan pou ariv 5. poursan nou prodwi domestik brit (*GDP*). Sa ti an rezilta rediksyon dan pri komodite ek karbiran lo marse enternasyonal, ensi ki en ogmantasyon dan valer marsandiz ek servis ki'n ganny eksporte sa lannen.

Anliny avek prozeksyon, nivo depandans ki pei i fer a leksteryer, pou reste plis ki lakantite reveni ki antre dan pei an 2024 e pour ekivalan en defisit 8.3poursan nou *GDP*, an vi lekspektasyon en logmantasyon dan pri komodite ek karbiran lo marse enternasyonal.

6. Revi lo Performans Ekonomik 2023 e Konteks Lekonomi pour 2024:

Mr Speaker, en revi nou performans 2023, i montre ki nou lekonomi pou agrandi par 3.8poursan. Sa i mwens ki ti'n prevwar e baze prensipalman lo faktor eksteryer ki pe enpakte lo nou. Sa rediksyon i baze lo bann nouvo devlopman lo nivo mondyal, sirtou kriz kou lavi dan bann pei devlope kot nou touris i sorti, pli ba krwasans ekonomik dan sa bann pei, ki'n osi redwir reset dan sa sektor konpare avek 2022.

Me, kantmenm sa, lo kote marse domestik, Sektor Lenformasyon Kominikasyon Teknolozi (*ICT*) in kontinyelman agrandi, e an 2023 sa sektor pe prozekte en krwasans 16poursan.

En lot sektor ki pe fer byen i Transportasyon ek Stokaz, kot nou pe prozekte en krwasans 11.8 poursan, e lapes semi-endistriyel pou rikord en krwasans 5poursan.

Dan Sektor Finansyel avek Lasirans, a lafen 2023, en krwasans 2 poursan pe ganny prozekte. Dan Sektor Konstriksyon, en krwasans 3 poursan pou ganny rikorde. En krwasans 2poursan in prozekte dan prodiksyon ton dan bwat par *IOT*.

En krwasans 4poursan pe prevwar dan sektor labwason ek taba. Dan prodiksyon blok, lezot prodwi ros avek lapentir, en krwasans 2poursan in estimen, an 2023. Dan sektor '*wholesale ek retail*', en krwasans 1.8poursan in ganny prozekte.

Mr Speaker, an 2024, nou pe prevwar ki pou annan en krwasans 4 poursan dan Prodwi Domestik Brit (*GDP*), akoz en ogmantasyon touris, anvi louvertir 3 gran lotel dan premye kar 2024.

Krwasans reel dan bann aktivite ki relye avek lendistri tourizm, parey; Akomodasyon, avek Servis Manze, parey restoran, Administrativ avek Lezot Servis Sipor in ganny estimen pour 4 e 2poursan respektivman.

Toudmenm, nou bezwen reste vizilan e responsab anvi sa konfli an Mwayenn Oriyan ki kapab afekte marse Izraelyen a lonterm, ki an se moman i kont pour 5poursan nou total touris ki vin Sesel.

E de plis, son potansyel pou afekte pri karbiran e lenflasyon lo nivo mondyal, sirtou, dan nou bann marse touris prensipal, ki Lerop. I enportan osi note, bann devlopman resan avek sa lager, parey mon'n dir i annan

potansyel pou enpakte lo pri karbiran, ki kapab pous pri komodite pli o, kree lenflasyon dan bann pli gran marse touristik pour Sesel, ki fer i pou vin pli ser pour touris vwayaze.

Tousala i bann senaryo ki nou bezwen pran an kont ler nou pe travay lo Bidze pei, e sa i bann analiz ki pou kontinyen ganny fer pandan lannen avek revizyon bize.

Lezot sektè ki nou pe ekspekte en krwasans an 2024 se Sektè *ICT* ek Konstriksyon, kot la prozeksyon i 10 e 4poursan respektivman. Pour Sektè Lagrikiltir, nou pe prevwar en krwasans 3 poursan, anvi ki pri manze zannimo in redwir.

Dan Sektè Prodiksyon oubyen *'Manufacturing'*, prodiksyon prodwi ton *IOT*, nou pe prevwar en krwasans 3poursan. Lo kote prodiksyon labwason ek taba, krwasans pour 3 poursan, e lezot prodiksyon, parey blok, lezot prodwi ros avek lapentir, i ekspekte annan en krwasans 3 poursan.

In osi prevwar ki pou annan en krwasans 2poursan dan Sektè Finansyel ek Lasirans. Sektè *'Wholesale ek Retail'* i ekspekte rikord en krwasans 2poursan en 2024.

7. Revi lo Performans Fiskal 2023:

Mr Speaker, lekonomi Sesel i ankor rezilyan e pe kontinyen agrandi, avek aktivite lekonomi ki'n preski dir ariv lo menm nivo avan pandemik *COVID-19*. Pour lannen 2023, pozisyon primer fiskal Gouvernman i ekspekte balanse.

An dot mo, kantite larzan ki nou pou kolekte e depanse pou preski parey. Sa i aköz nou'n anmas plis reveni ki ti'n prevwar e in annan en pti rediksyon dan depans, aköz retar ki'n annan dan egzekisyon serten proze kapital.

Sa performans, ansanm avek en to lesanz ki'n stab, i fer ki nou pou fini lannen avek en stok det 64.4 poursan nou Prodwi Domestik Brit (*GDP*). Sa i ankor soutenab, e gard nou lo bon semen pou ariv lo target pou redwir det pei ziska 50poursan nou *GDP*, ver lannen 2030.

Mr Speaker, nou estimen ki pour lannen 2023, nou reveni total ki osi enkli bann don pour R9.9 bilyon, ki ekivalan 34poursan nou *GDP*. Sa estimasyon i preski konsistan avek sa ki nou ti'n prevwar dan revizyon Bidze milye lannen.

Nou pou selman rikord en pti rediksyon par R5milyon

oubyen 0.05poursan. Ler nou konpar sa reveni total an 2023 avek sa ki pou 2022, in annan en ogmantasyon anviron R1.1 bilyon oubyen 13poursan, aköz in annan en ogmantasyon dan koleksyon taks pour sa lannen.

Mr Speaker, an sa ki konsern zis reveni taks, an 2023, sa sonm total pour R8.4bilyon oubyen 28.98 poursan nou *GDP*, ki ane 14 poursan anplis ki sa rikord etabli an 2019.

Sa i reflekte en ogmantasyon R11.2milyon oubyen 0.13poursan, konpare avek sa ki nou ti'n prevwar pandan revü Bidze *mid-year*. De taks ki'n kontribye dan sa ogmantasyon i taks biznes e propriyete. Ansanm zot in kontribye pou ogmant nou prozeksyon par R71.5milyon.

Koleksyon taks biznes in enn ki'n perform tre byen pou ariv lo en prozeksyon R1.6bilyon, prensipalman aköz lagrandisman sèkter '*securities dealers*' dan lendistri finansyel.

Lo kote taks lo propriyete ki bann etranze i annan isi, li osi in perform tre byen pandan lannen, ki fer nou'n ogmant nou prozeksyon par R35.6 milyon. Par kont, Mr Speaker, in annan en rediksyon R60.4milyon dan nou prozeksyon pour lezot kalite

taks, ler ou konpar avek revizyon Bidze milye lannen.

Dan sa rediksyon total, sa nouvo lalwa '*Tourism Environmental Sustainability Levy*' e '*Tourism Turnover Tax*', i responsab pour en rediksyon R25.9milyon.

Mr Speaker, pandan revü milye lannen, nou ti prezant en Bidze siplemanter R275.5 milyon ek en rediksyon R621.4 milyon dan depans Gouvernman.

Sa i en rediksyon zeneral R345.9milyon konpare ek sonm orizinal ki ti'n prevwar dan Bidze. Nou pou termin 2023 avek en balans defisit primer SR2.4milyon.

8. Bidze 2024 e Performans Fiskal Mwayen Term:

Pour lannen 2024, Mr Speaker, Gouvernman pe propoz en depans R10,640,628,966. Sa i reprezant en ogmantasyon 1poursan, ler ou konpar avek '*Appropriation Bill*' 2023, ki ti R10,495,149,665.

Nou pe osi prozekte pou kolekte R10.9 bilyon an term reveni ek bann don. Pour lannen 2024, Mr Speaker, Gouvernman pe prozekte en sirplis dan nou balans primer fiskal.

Nou pe prevwar en sirplis R332 milyon, ki reprezant 1.1

poursan nou *GDP*. Rezon pour sa sirplis, se akòz nou ekspekte nou lekonomi kontinyelman agrandi, alòrs koleksyon reveni pou ogmante par R907milyon ouswa par 9 poursan.

Dan mwayen term, nou ekspekte ki sa sirplis fiskal i ganny mentenir, ki ava kapab ed nou dan repeyman nou det, e kree plis rezilyans.

9. Koleksyon Reveni pour 2024: Mr Speaker, parey nou konnen, Gouvènmàn i kolekte son reveni apartir de sours prensipal. Premyèman i annan taks, ki pour 2024 nou pe prozekte en total R9.19 bilyon, ki reprezant 30.3poursan nou *GDP*. Sa prozeksyon i plis ki sa ki ti an 2019, e i reflekte mannyer nou lekonomi pe refer e osi lezot devlopman.

Sa total i en ogmantasyon R760milyon, oubyen 4.6poursan ler ou konpar avek 2023. Koleksyon reveni taks i ekspekte kontribye a pepre 85poursan reveni total, avek en ogmantasyon prensipalman dan Taks Biznes, Lezot Taks (*Other Tax*) e Taks Valer Azoute (*VAT*).

Sa ogmantasyon i prensipalman gras a koleksyon R254.0 milyon anba Taks Valer Azoute (*VAT*), R146.4 milyon anba Taks Biznes, e R166.8

milyon anba lezot taks. An 2024, bann '*non-tax revenue*' i ekspekte ogmante par a pepre R143 milyon.

Bann don ki nou gannyen i ekspekte ogmante par a pepre R5.8 milyon. Dan mwayen term, reveni total ek bann don in ganny prozekte pou ariv a pepre 35.8poursan nou '*GDP*'.

10. Labaz Depans Gouvènmàn:

Mr Speaker, Gouvènmàn i bezwen reste pridan e responsab dan son depans pour lannen 2024 e mwayen term. Nou rekonnèt ki nou bezwen envestir en pe plis dan nou program sosyal e lenfrazstriktir. Me nou bezwen fer li dan en fason soutenab.

Pour lannen 2024, nou pou travay lo en revè nou bann striktir fonksyonman bann Minister, Departman e Lazans, baze lo lenvestisman dan nouvo teknolozi ki nou pe enplimante.

Sa i ava permet nou prepar nou bann travayer lo sa sanzman ki nou bezwen e osi donn en pli bon servis sèkter prive e piblik an zeneral.

Sèkter Lasante e Sèkter Ledikasyon i reste sa de pli grosom dan Bidze avek en total R1.41 bilyon e R1.40bilyon respektivman. Sa i reprezant 13.3poursan e 13.1 poursan

respektivman Bidze total ki nou pe propoze.

Bidze byen e servis i reste pli gro sonm dan Bidze 2024 avek en total R3.73 bilyon ki reprezant 35.1 pousan depans total Gouvernman. Sa i osi pe reprezant 12.3pousan *GDP* konpare avek 12.8pousan-*GDP* dan revizyon Bidze an 2023.

Gouvernman pou kontinyen rod fason pou vwar plis efikasite e redwir bann depans operasyonnel e servi sa larzan pou envestir plis dan bann program.

Mr Speaker, en sonm R1.43 bilyon pe ganny propoze dan program lenvestisman kapital ki reprezant 4.7pousan *GDP*. Sa i en ogmantasyon R211.3 milyon konpare avek Bidze revize an 2023 e R835.3 milyon letan ou konpar avek depans anba proze kapital an 2022. Sa sonm R1.43 bilyon pe ganny finanse konm swivan;

1. Finansman domestik R876.6 milyon

2. Finansman par bann *loan* R277.7 milyon

3. Finansman par bann don R304.4 milyon

Mr Speaker, sa i demontre langazman sa Gouvernman pou envestir plis Bidze dan nou bann proze kapital, ki pou ed lagrandisman nou lekonomi

dan mwayen e lonterm e kontribye dan devlopman sosyoekonomik nou pep.

11. Reminerasyon ek Saler:

Mr Speaker, dan Bidze 2024, nou pe osi propoz en Bidze SR 3.6 bilyon pour reminerasyon ek saler dan servis piblik. Sa i reprezant 11.7 pousan *GDP* konpare avek 11.2 pousan dan Bidze revize an 2023.

Bidze 2024 i osi pe montre en ogmantasyon par R295.1 milyon ouswa 9pousan letan ou konpar avek Bidze revize an 2023. Dan mwayen term Bidze reminerasyon ek saler, pou ariv lo sa nivo 11pousan *GDP*. En to, ki dapre bann resers ek analiz ki'n ganny fer i rekomande pour bann pti leta zil.

Alors mon demann tou travayer servis sekte piblik, pou perform a en oter ki pou ed lekonomi agrandi plis. Nou pou kontinyen envestir dan nou travayer pou prepar zot dan sa transformasyon ki nou anvi vwar arive dan servis piblik.

Mr Speaker, en servis piblik modern i enn bann priyorite Gouvernman. Sa lankadremans performans baze lo rezilta ki enkli '*performance management*' pe fini ganny enplimante.

Bann programm formasyon pour travayer servis piblik in konmanse e pou kontinyen. Parey zot in war semenn pase, nou'n konmans ek en programm formasyon '*leadership*' pour bann Sekreter Prensipal. Sa pe ganny fer an partenarya avek Gouvernman UAE. Nou'n osi konplet en programm formasyon pour bann travayer resours imen.

Nou pe osi fer revizyon dan striktir labours, pour bann travayer ki deza dan lanplwa servis piblik, pou asire ki i annan en devlopman kontinyel.

Dan lefase Gouvernman pann toultan stratezik dan la fason ki in donn labours. Bann landrwa ki nou'n war serten mankman mendev pann ganny prioritize.

Sa i bezwen sanze. Ozordi nou war ki difikilte ki egziste pou fer rekritman e ki mannyer serten pozisyon i reste '*vacant*', kantmenm lavertisman i ganny mete.

Sa i montre en defayans dan '*manpower planning*' e i bezwen sanze. Komansman 2024, avek finalizasyon '*manpower planning plan*', nou pou prioritize labours dan bann domenn ki annan gran demann.

Mr Speaker, i osi enportan note ki an Avril 2023,

Gouvernman ti fer en ogmantasyon an mwayenn 10 pousan, apre ki detrwa alawenns ti ganny konsolide dan sa saler.

Sa ogmantasyon pe kout Gouvernman R218 milyon an 2024, konpare avek R158 milyon an 2023. Logmantasyon saler in osi annan lenpak lo peyman trezyenm mwan aköz bann alawenns ki'n ganny konsolide.

Alor pour lannen 2024 en provizyon R136 milyon pe ganny bidzete konpare avek R116 milyon ki'n ganny depanse an 2023.

Mr Speaker, dan lefase bokou lanfaz in ganny mete lo bann '*scheme of service*' pour bann travayer teknik dan bann diferan Minister, Departman e Lazans. Ozordi, nou'n war ki avek nouvo lankadremman lo zesyon Gouvernman, ki baze lo rezilta (*RBM*), nou bezwen met osi plis lanfaz lo bann lezot '*cadre*' parey bann travayer resours imen, lenformasyon teknolozi e administrasyon.

Alors pour sa 3 skim provizyon Bidzeter pour sa revizyon i R4.2 milyon. Bann lezot skim pour bann Minister, Departman ek Lazans, pou ganny revize letan lespas Bidze i permet.

12. Depans Enprevi (*Contingency*):

Mr Speaker, en sonm R88.2 milyon in ganny mete dan Bidze 2024 konpare avek R50 milyon dan Bidze 2023. Sa ogmantasyon i pou peyman dezyenm faz konpansasyon pour bann ka polisyon delo La Misère. Nou ekspekte sa bann peyman i ganny fer pandan premye sis mwan 2024. Bann detay pou ganny finalize par Biro Prokirer Zeneral.

Pour lannen 2023, nou'n kapab met en propozisyon devan bann zabitan pou pey konpansasyon ki konsern polisyon stasyon elektrisite Baie Ste Anne Praslin.

Nou ekspekte pou finaliz peyman avan lannen 2023, pour tou bann endividi ki'n aksepte sa propozisyon e siny zot lagreman.

13. Depans dan bann sektor priyoter:

13.1 Sektor Lasante:

Mr Speaker, pour lannen 2024, nou pe fer en alokasyon Bidze R1.41 bilyon pour Sektor Lasante ki reprezant 4.7poursan *GDP*, konpare avek 4.5poursan *GDP* dan Bidze revize an 2023. En alokasyon R693.4 milyon, pe ganny prozekte dan Bidze reminerasyon e saler dan sektor

lasante ki pe reprezant 49 poursan depans anba sa sektor.

Dan Bidze 2024, en sonm R639.6 milyon pe ganny fer anba byen e servis e mazorite pe ganny mete anba Lazans Swen Lasante pour bann depans swivan:

- Latizann - R73.6 milyon
- Tretman dyaliz - R76.8 milyon
- Provizyon medikal - R104.5 milyon
- Provizyon manze pour bann pasyan - R27.4milyon
- Tretman medikal spesyalize - R 50 milyon

En sonm R 79.3 milyon pe osi ganny prozekte anba bann proze kapital pour Sektor Lasante, pour sa bann proze swivan;

- i. Mentenans kontinyel Lopital Sesel- R9.6 milyon
- ii. Travay Renovasyon Lopital Baie Ste Anne- R4.5 milyon
- iii. Lopital La Digue- R8.7 milyon pou prensipalman travay adisyonnèl pou en 'stand-by generator' e 'alluminium ceiling'.
- iv. Renovasyon ex NIHSS- R11.3 milyon. Sa lenfrastruktir pou

ganny servi pou reabilitasyon bann dimoun avek latak laservel.

v. Azout nouvo fasilite dan batiman *NIHSS*- R4 milyon

v. Nouvo Stor Medikal Providans- R5 milyon

vi. Nouvo laliny 'Sewerage' kot Lopital Sesel- R2.8 milyon

vii. Ekstansyon *ICU* kot Lopital Sesel- R4 milyon

ix. Renovasyon Sant Lasante

Les Mamelles- R1.1 milyon

x. Konstriksyon Sant Lasante

Baie Lazare – R4.8 milyon

xi. Renovasyon bann diferan

lenfrastruktir lasante – R10 milyon

Mr Speaker, apartir 2025, Gouvernman pou konmans konstriksyon nouvo lopital Sesel. An 2024, Lopital Sesel pou ganny li 100 an.

E parey nou kapab konstate, avek logmantasyon dan bann maladi non transmisib, par egzamp dyabet, kanser e tansyon, lobzektif i ki

avek en nouvo lopital pli modern, ekipe avek bann lekipman pli avanse, nou pou kapab fer plis loperasyon ek tretman isi Sesel dan plas anvoy nou Seselwa trete aletranze.

Sa konstriksyon pou enn bann pli gro proze ki Sesel in deza enplimante. Nou estimen ki sa nouvo lopital pou kout apepre R1 bilyon. Gouvernman pe fer bann demars finansman pour nouvo lopital. La, mon ti ava osi lans en lapel pour tou Seselwa, pou fer en kontribisyon pour sa nouvo lopital.

13.2 Sekter Ledikasyon:

Mr Speaker, lenvestisman dan Sekter Ledikasyon i reste en priyorite Gouvernman. Nou lavenir konman en sosyete rezilyan, i depan bokou lo ki mannyer nou ankadre nou fitir sitwayen.

E ledikasyon i sa pwen santral kot nou zanfan i aprann plis ki zis lir, ekrir e konte. I sa landrwa kot zot osi aprann bann valer lavi, bann valer moral, bann skil kiltirel e sportif.

En alokasyon Bidze R1.40 bilyon pe ganny fer pour lannen 2024 pour Sekter Ledikasyon. Sa i reprezant 4.6 pousan *GDP*.

En alokasyon R598.6 milyon pe ganny propoze dan Bidze reminerasyon e saler dan sekter ledikasyon, ki reprezant 42.8 poursan depans anba sa sekter. Pli gro sonm depans pour sa sekter i anba byen e servis pour en sonm R 657.7 milyon ki reprezant 47.0 poursan depans anba sa sekter.

Mr Speaker, avek bi pou asire ki lanvironnman lekol i reste enn ki konvenab pour laprantisaz, e kot lekol i osi evolue avek teknolozi, dan mwayenn term en total, R63.76 milyon in ganny bidzete pour akizisyon sez, latab e konpiter pour bann lekol.

En sonm R41.1 milyon pe ganny propoze pour Gouvernman kontinyen avek son program donn '*breakfast*' pour tou etidyan dan lekol leta, primer e segonder e osi dezennen.

En sonm R70.9 milyon pe osi Bidze pour servis bis *SPTC* pour bann etidyan.

Mr Speaker, parey ti anonse le 27 Oktob, Lenstiti pour Devlopman Pti Anfans (*IECD*) in vin en Kategori 2 pour sant Pti Anfans e Ledikasyon *UNESCO*. Sa lenvestisman ki Gouvernman pe fer pe anmenn bon rezilta.

En sonm R27.6 milyon in ganny bidzete an 2024, pour '*Day Care Scheme*' e dan '*ECCE Trust Fund*' i annan en sonm R1.6 milyon ki'n ganny bidzete. Bann '*day care*' e '*childminders*' i ganny asiste anba sa fon, kot zot kapab fer laplikasyon pour lekipman ki a met zot lo bann standar ki *IECD* in etabli.

En sonm R198 milyon pe ganny bidzete dan fon letid an 2024. Sa i kouver pour bann dimoun ki deza dan lanplwa, e osi bann etidyan ki fek sorti dan bann sant profesyonnel.

Parey mon'n mansyonnen avan, nou bezwen travay avek nou bann etidyan pou fer sir zot pran bann letid avanse baze lo demann priyorite pei.

Nou deza war dan sa bann dernyen lannen kot bokou etidyan i pran bann kour lo nivo degre ki zeneralize, parey '*Business administration*'. Me nou war ki bezwen pei i pa neserman dan sa bann domenn.

I annan bann domenn pli teknik ki annan en mankman ki nou bezwen met lanfaz lo la. Savedir, Gouvernman pou bezwen fer en travay pli konpreansiv, avek bann formater '*careers guidance*' avek Liniversite Sesel pou ofer bann degre dan bann sekter ki pli relevan e an demann.

Mr Speaker, apard program labours Gouvernman, sa opsyon pou pran *loan* pou investir dan ou prop ledikasyon, i ankor egziste. Dan Bidze 2024, nou pe fer en alokasyon R8 milyon pour skim ‘*loan* edikasyonnel’ avek bann labank komersyal. Sa skim ti lanse an 2023.

En sonm R5 milyon pe ganny bidzete, konman kontribisyon Gouvernman pour Liniversite Sesel. Sa sipor pou al anver renovasyon bann fasilite lenfrastruktir e osi dan devlopman bann program ki anliny avek bezwen sekter lanplwa Sesel.

Pour lannen 2024, Gouvernman pou revwar *laptop* skim pou osi enkli tou etidyan senkyenm ek sizenm dan lekol leta e prive. Ozordi tou etidyan segonder e sant profesyonnel pe benefisyé anba sa skim.

Sa skim i en kontribisyon R3,000 anver pri *laptop* ki zot aste. Sa skim pe kout Gouvernman en sonm R5milyon par lannen. Nou demann tou etidyan ki pou benefisyé anba sa skim pou pran sa loportinite, an vi ki teknolozi pe ganny entegre dan sistenm ledikasyon.

Mr Speaker, en sonm R21.4 milyon pe osi ganny bidzete pour ‘*stipend*’ ki bann

etidyan sant profesyonnel i resevwar. An vi bann defi ki bann etidyan ki sorti lo bann zil pros i rankontre letan zot vin etidye lo Mahe, konsiderasyon pour en ogmantasyon dan zot alawenns in ganny pran dan Bidze 2024.

Bann etidyan zil pros pou aprezan resevwar en alawenns R2,000 par mwan, sa i ogmantasyon R600.

Pour bann etidyan ki pa’n kalifye pou antre dan bann sant profesyonnel, en sonm R11.2 milyon dan Bidze in ganny mete pou kouver program ‘*Apprenticeship Scheme*’.

Mr Speaker, lannen prosen nou pe donn loportinite etidyan lo La Digue e Praslin, ki pou swiv Letid A ‘*Level* an 2024, pou fer li kot lekol ‘*Vijay International*’ dan plas vin Mahe.

Minister Ledikasyon pou travay lo lankadremman pou kouver sa program, e zot pou enform bann etidyan a en moman apropiye.

Sa i ava fer ki bann zanfan pa ava bezwen kit zot lakour, pou vin Mahe, pou kontiny zot letid.

En sonm Bidze R142.1 milyon pe ganny propoze dan Bidze 2024, pour proze kapital dan sekter ledikasyon. An Septanm sa lannen, nou ti siny

lagreman en *loan* pour en lavaler US\$10 milyon avek Fon Saoudyen pour Devlopman, pour konstriksyon nouvo lekol La Digue.

En sonm R83.1 milyon in ganny bidzete dan Bidze 2024 pour ki konstriksyon sa lekol i demare. Sa lannen, Gouvernman pe fer en fasilite tanporer, pour ki bann zanfan i kapab servi pandan ki konstriksyon sa nouvo lekol i konmanse an 2024.

Mr Speaker, parey bokou lenfrastruktir dan pei ki zot leta in deteryore, sa osi i enkli bann lekol. Pour lannen 2024, Gouvernman pou depans dan sa bann proze kapital swivan;

- i. Kontinyasyon konstriksyon lakres Anse Royale- R4.5 milyon
- ii. Konstriksyon nouvo blok lekol primer La Rosiere - R 18 milyon
- iii. Renovasyon lekol primer La Rosiere- R6.2 milyon
- iv. Konstriksyon nouvo blok Lekol Beau Vallon- R1.2 milyon
- v. Renovasyon lekol Glacis- R3.5 milyon
- vi. Renovasyon lekol primer Perseverance- R1.6 milyon

- vii. Renovasyon lekol Belonie- R3 milyon
- viii. Travay renovasyon lo lekol segonder Anse Boileau - R3 milyon
- ix. Renovasyon lekol English River- R1.5 milyon
- x. Renovasyon lekol segonder Plaisance - R1.2 milyon
- xi. Konstriksyon '*Boundary Wall*' kot lekol A '*level*' - R3.6 milyon
- xii. Travay renovasyon e nouvo konstriksyon kot Lenstiti Lagrikiltir e Ortikiltir- R3.8 milyon
- xiii. Travay Renovasyon kot lekol ki donn lankadremman bann ansennyann (*SITE*)- R4 milyon e
- xiv. Bann lezot Renovasyon bann diferan lenfrastruktir lekol dan sektor ledikasyon- R3.9 milyon

Mr Speaker, mon anvi sezi sa loportinite, pou lans en lapel avek tou paran e tou bann ankadrer pour ki zot pran letan pou enkilke bann bon fason fer dan nou bann zanfan. E bann

zanfan ki zot sezi letan ki zot gannyen pou pran zot letid o serye e investir letan dan keksoz ki pozitiv.

13.3 Sekter Lakaz:

Mr Speaker, pli gro sonm dan Bidze proze lenfrastruktir pe ganny Bidzete dan sekter lakaz ek later pour en sonm R335.4 milyon, ki pe reprezant 22.5poursan Bidze total proze kapital an 2024.

Gouvernman pe kontinyen rod finansman nesaser, ki pou ed li investir dan bann proze lakaz pou ed nou popilasyon annan zot prop lakaz. Nou rekonnet ki i annan bokou endividi ki ankor pe rod en lozman. Sa sonm dan Bidze 2024, i pour sa bann proze swivan; i. Proze *Land bank*

a. *Ex Deltel Dan Banbou Anse Royale*- R15 milyon

b. *Cap St Marie Land Bank*- R4.5 milyon

c. *La Retrait Land Bank*- R9.7 milyon

d. En provizyon pour bann lenfrastruktir *PUC* lo bann proze *Land Bank*- R5 milyon

ii. Proze Lozman:

Bann proze lozman;

a. 12 younit *Ex-Ferrari*- R8.0 milyon

b. 32 younit *social housing*- pou R9.5 milyon

c. 24 younit *Ex-Zelia Anse Boileau*- R 12.6 milyon

d. 24 younit *La Gogue*- R13.3 milyon

e. 6 younit *Mt. Plaisir Grand Anse Praslin*- R3.4 milyon

f. 16 younit *Anse Francois Pointe Larue*- R8.3 milyon

g. 16 younit *Waterloo St. Louis*- R9.2 milyon

h. 12 younit *Ex-Kashugie Bel Ombre*- R3.8 milyon

i. 16 younit *Anse Poules Bleus Faz II*- R8.5 milyon

j. 24 younit *Roundabout Perseverance*- R5.6 milyon

k. 24 younit *Ex-PSSW Faz 2 Cascade*- R14.3 milyon

l. 24 younit *Corgat Faz 4 Mont Fleuri*- R10 milyon

m. 40 younit *Vilaz Orkid Faz 2*- R25 milyon.

En sonm R15 milyon dan Bidze 2024 pe ganny prozekte pou konplet bann lenfrastruktir de baz, pou fasilite konstruksyon 128 younit ‘*mid-range condo*’.

Mid range condo pe target bann profesyonnel ki pran zot prop loan avek labank komersyal. Sa bann ‘*mid-range condo*’ pour lo sa bann sit swivan:

a. *Ex Desaubin* – Takamaka

b. *Ex Sacos* – Anse Royale

c. *Ex Tarmac* – Petit Paris – Cascade

d. *Ex Daycare* – Bel Air e Perseverance – Akote Condo PMC.

Mr Speaker, an Septanm sa lannen, nou ti siny en lagreman pour sa lot *loan* lavalèr US\$ 15 milyon avèk Fon Saoudyen pour Devlopman, pour konstriksyon 172 younit proze lakaz dan 7 distrik pandan 2024 a 2026. En provizyon R84.5 milyon pe ganny prozèkte pour lannen 2024 pour sa bann proze.

Bann proze lakaz ki Gouvernman pou finansè anba Fon Saoudyen pour Devlopman, i dan sa bann distrik swivan:

- a. Anse Aux Pins - Karyol,
- b. Au Cap – *Ex Farm*,
- c. Anse Royale – Mont Plaisir,
- d. Beau Vallon - Vilaz Paskal,
- e. Glacis – *Ex Sacos*,
- f. Perseverance e
- g. Baie Ste Anne – Marie Jeanne.

Adisyonnèlman, en sonm R10 milyon in ganny bidzete pou repar bann lakaz pour bann endividi ki pli dan bezwen e pa kapab rod finansman pou fer sa bann renovasyon.

En lot sonm R10 milyon pe ganny mete pour bann proze lakaz anba skim spesyal. Sa skim i pou konstrir lakaz pour

bann endividi ki pa kalifye sonm total pri konstriksyon zot lakaz. Sa skim i en partenarya ant Minister responsab pour lakaz ek *HFC*.

Mr Speaker, Gouvernman in osi fer en provizyon pour en sonm R18 milyon anba skim finansman lakaz avèk bann labank. Sa skim i ed bann endividi ki pe ganny en saler pli ba ki R30,000 e ki pran *loan* avèk bann labank, pou sipòrt zot finansman e fer zot kapab konplet konstriksyon zot lozman e fer zot repeyman vin abòrdab.

Gouvernman in osi met en sonm R5 milyon dan Bidze pour skim renovasyon lakaz bann pansyoner. Sa i en *loan* avèk *HFC* pour bann pansyoner, ki anvi fer serten renovasyon lo zot lakaz.

Mr Speaker, an 2024, *HFC* pou osi revwar son bann fasilite ki i ofer, pou reflekte nouvo realite ozordi. Sa ava ganny anonse boner 2024.

Mr Speaker, nou rekonnèt ki endividi ki pe esper lozman avèk Gouvernman pe lwe lakaz avèk sekter prive, e sa sonm i kapab tre eleve e zot vwar zot dan bann sityasyon pli kwense, pou fer de bout zwenn.

Alors, Gouvernman i annan en skim *part 'rental'* pou ed sa bann endividi avèk en

morso sa 'rent'. Sa skim i pour bann endividi ki zot saler i par anba R19,000, ki en ogmantasyon aköz sa sonm avan ti R15,000. Sa bann ki kalifye anba sa skim zot kapab ganny lasistans ziska 55 poursan zot 'rental' ki zot pe peye. En alokasyon R12 milyon pe ganny prozekte dan Bidze pour sa skim.

Mr Speaker, Gouvernman pe osi travay avek Bord *PMC* pou eksplor posibilite en model pou finans konstriksyon lakaz. Ozordi Gouvernman i konstrir lakaz, e apre transfer sa bann lakaz lo *PMC* pou zere.

Peyman 'rent' i ganny fer avek *PMC*, ki fer zot retenir sa bann reveni. Alors nou pe eksplor diferan model dan ki sa reveni anplis a kapab ganny servi, pou ede dan konstriksyon lakaz. Nou ekspekte finans 2 proze lakaz dan sa fason dan mwayen term.

13.4 Devlopman *Sport*

Mr Speaker, lenvestisman dan sport i reste touzour en lenvestisman dan nou zenn, nou popilasyon an zeneral, dan lasante nou popilasyon e dan nou pei. *Sport* i reste sa eleman kle ki touzour inifye en pep, malgre tou son diferans.

Langazman dan aktivite sportif, i ed nou fizikman, e

mantalman par asire ki nou annan en pep ki an bonn sante.

Pou asir en langazman sportif o pli o nivo posib, e ankouraz partisipasyon nou popilasyon, nou bezwen annan lenfrastruktir sportif ki atiran e ki osi lo standar.

Pandan sa bann dernyen lannen, sa Gouvernman pe envestir bokou, pou remet nou bann lenfrastruktir sportif lo en nivo akseptab. Sa lenvestisman pou kontinyen.

Zisteman, en sonm R48.3 milyon pe ganny mete dan Bidze 2024 pour bann diferan lenfrastruktir sportif konm swivan;

a. Travay renovasyon Stad Linite - R5.5 milyon

b. Kontinyasyon travay renovasyon 'Palais des Sports'- R7 milyon

c. Renovasyon Roche Caiman *Swimming pool*- R1.5 milyon

d. Renovasyon lezot fasilite lenfrastruktir *sports*- R1.5 milyon

e. Renovasyon 'flooring' *Victoria gymnasium*- R1.5 milyon

Nou bezwen osi desantraliz en pe nou bann lenfrastruktir sportif. Nou konstata ki nou bann zenn atlet i perdi letan pou desann anvil pou vin servi sa bann fasilite,

letan ki zot ti pe kapab konsantre dan zot lantrennman.

Alors, Gouvernman dan sa prosen 2an pou konplet bann proze lo *Sports Complex* Anse Royale e La Digue. Dan Bidze 2024, sa bann proze swivan pou demare;

a. Renovasyon Anse Royale *Sports Complex*- R4.5 milyon

b. Konstriksyon en '*Indoor Court*' Anse Royale- R 15.6 milyon

c. Renovasyon La Digue *Sport Complex*- R1 milyon

Mr Speaker, an 2025, Sesel pou organiz *CJSOI* e konman en pei nou bezwen asire ki tou fasilite sportif i alaoter. En sonm adisyonnèl R10 milyon in ganny mete dan Bidze pou siport bann lezot travay renovasyon lo bann fasilite sportif.

Pou *facilitate* partisipasyon Sesel dan *CJSOI*, en sonm R35.7 milyon in ganny mete dan Bidze 2025 anba byen e servis, pour lorganizasyon e partisipasyon dan sa levennman.

En sonm R4.3 milyon in osi ganny mete pour bann pti renovasyon bann lezot lenfrastruktir sportif dan distrik. Sa i ava siport zefor ki

Gouvernman pe fer, pour ki bann zenn i reste angaze dan bann aktivite sportif, ki ava anpes zot tonm dan bann move fleo.

Nou pe osi met en sonm R3.4 milyon dan Bidze 2024, pour devlopman spor lo en baz profesyonnel. An 2024, i annan en sonm R1.3 milyon pour partisipasyon dan zwe Olenpik e S4.6 milyon pour partisipasyon dan zwe '*All Africa Games*'.

En sonm R3.2 milyon in ganny bidzete pour lasistans pour bann federasyon. En sonm R710,000 in osi ganny mete, pour lasistans bann lekip letan zot vwayaze lo bann zil pou fer konpetisyon. En sonm R1.7 milyon pe ganny bidzete pour devlopman bann zenn dan sports e R1.1 milyon pou idantifye talan.

13.5 Sekter Sosyal

Mr Speaker, en popilasyon edike, an bonn sante, travayan, rezilyan, for e responsab, i reste labaz devlopman sa pei. An dot mo, Mr Speaker, pour Sesel kree plis larises pour son popilasyon, i bezwen e depan lo sa menm popilasyon pou reisir.

Ozordi, nou war bokou Seselwa pe sezi tou loportinite pour zot avanse dan zot lavi, me an menm tan, nou war ki en

annan en group ki pe fer fas avek bann fleo sosyal.

Mr Speaker, koman en Gouvernman, e koman en pei, nou pa kapab inyor sa sityasyon, ki mon menm kapab dekrir koman en ‘*KRIZ NASYONAL*’.

Mr Speaker, Gouvernman pe investir bokou pou konbat bann fleo sosyal. Premyerman, sa batay pou anpes drog ilegal antre dan nou pei pou kontinyen. Dezyenman, nou bezwen kontinyen donn sipor bann ki’n tonbe, aköz labi drog ilegal ek lalkol. Sa travay prevansyon e reabilitasyon i mars kot a kot.

Alor, dan Bidze 2024, nou pe fer provizyon pour de proze pou siport reabilitasyon bann pasyan avek adiksyon:

- i. En nouvo sant reabilitasyon pour bann pasyan avek adiksyon ki pou baze vizavi Sant Lasante English River – ki pou kout R14.5 milyon e
- ii. Renovasyon sant Anse Bouden – Praslin, pour bann pasyan avek adiksyon- R3 milyon

Mr Speaker, anplis ki sa, resers in montre ki labi drog ek

lalkol i rezon prensipal, aköz bokou dimoun i tonm dan lapovrete. Mazorite reveni en lakour i ganny depanse lo sibstans.

Pour nou koman en pei pli byen konpran gravite e lenpak sosyoekonomik sa sityasyon, an se moman Gouvernman avek sipor Labank Mondyal, pe fer en letid.

Rezilta sa letid a permet Gouvernman pran bann mezir pli efektiv, targete e konpreansiv pou ede adres sa kriz ki nou pei pe fer fas avek.

Mr Speaker, la mon fer en lapel nasyonal, ki nou tou, nou fer nou kontribisyon pou lager kont sa bann fleo sosyal.

Toudmenm Mr Speaker, nou rekonnet ki pou toultan annan en group ki pou bezwen sipor anplis, e parey in leka, Gouvernman pe kontinyen furni sa sipor pou ed nou popilasyon ki dan bezwen.

Alors, en alokasyon R1.3 bilyon pe ganny bidzete pour bann benefis ek program anba Lazans Proteksyon Sosyal. Bann pli gro sonm anba bann benefis e program Lazans Proteksyon Sosyal i konm swivan;

- i. R868.4 milyon pour benefis retrait
- ii. R161.2 milyon pour benefis dezabilite

- iii. R109.1 milyon pour benefis envalidite
- iv. R61.8 milyon pour ‘*Social Safety Net*’

Mr Speaker, an tou, zis sa kat benefis i pran 1.2 bilyon oubyen 96 poursan sa sonm total, anba Bidze benefis ek program anba Lazans Proteksyon Sosyal.

Sa sonm total R1.3 bilyon i anfefe reprezant 11poursan sonm total Bidze Nasyonal.

Mr Speaker, Sa i en gro sonm. Alor mon oule pran en moman pou demann avek tou Seselwa, pou seryezman reflexion lo sa sonm R1.3 bilyon, ki al anver zis benefis ek program ASP. 11poursan nou Bidze nasyonal!

Avek en popilasyon ki pe kontinyelman vyei, sa sonm pou kontinyelman monte.

Revizyon dan bann Benefis Sosyal – *Statutory*

Mr Speaker, anliny avek stratezi Gouvernman, pou anmenn en sisten sipor sosyal pli ekitab e soutenab, ozordi mon pe anonse ki nou annan revizyon dan serten ‘*Statutory Benefits*’.

Sa travay pou revwar sa bann benefis in ganny fer lo en peryod plis ki lan e an konsiltasyon avek bann partener kle.

I enportan pou note ki serten benefis pann ganny revize depi 2016 e i kler ki la fason ki sa bann benefis ti ganny revize dan le pase pa ti ganny fer dan en fason striktire.

Alors, a lavenir Gouvernman i ekspekte met en striktir an plas, ki pa zis formaliz ki fason bann benefis sosyal i ganny revize, me pou osi regarde si i pe fer son fonksyon prenan kont laspe sosyal e Bidzeter.

Alors Mr Speaker, apartir Zanvye 2024, pou annan en ogmantasyon dan sa bann benefis swivan;

- Maternite/Paternite – sa pou aplik spour manman oubyen papa ki travay pour zot menm (*self-employed*) oubyen ki travay lo en baz ‘*casual*’.

- Semi orfelen – en zanfman ki’n perdi enn son paran

- Zanfman abandonnen oubyen orfelen – en zanfman ki’n perdi tou lede son paran

- ‘*Foster Parent*’ – en endividi ki pare pou pran en zanfman ki dan sistenm, vin reste kot e sonny sa zanfman

- ‘*Foster Child*’ – en zanfman ki dan sistenm

- ‘*Survivor*’ – en dimoun ki’n perdi en partner ki ti pe resevwar en benefis avek ASP

- benefis pour bann manman ki pe al donn nesans

sorti lo bann zil pros ki bezwen desann Mahe, osi konnen koman benefis pour ‘*expectant mother*’.

Anplis ki sa, Mr Speaker, Gouvernman pe azout en nouvo benefis anba ‘*Statutory Benefits*’, sa i pour bann madanm ki donn nesans plis ki en pti baba a la fwa, sa ki an Angle nou apel ‘*Multiple Births*’.

Mr Speaker, revizyon dan sa bann benefis i konm swivan;

□ Maternite/Paternite pou sorti R2480 pou vin R6633.50, avek nivo lasistans konsistan avek lalwa lanplwa.

□ Semi Orfelen, aprezan zot benefis pou vin R2350, olye R1300

□ Orfelen oubyen zanfan abandonnen, pou sorti R1540 pou mont R3134

□ *Foster Child* pou monte pou vin R3134, olye R1300

□ *Foster Parent* pou ganny en lasistans maximum R25,000, koman en ‘*one off*’

□ Survivor pou sorti R2480 pou vin R5224 e

□ Alawenns pour manman ki pe al donn nesans sorti lo bann zil pros ki bezwen desann Mahe, zot benefis pou monte sorti R1500 pou vin R5000. Sa enn osi pour en ‘*one off*’

Pour sa nouvo benefis – *Multiple Births* – paran pou ganny en sonm R3134 pour sak

zanfan adisyonnal, ziska en maksimonm R6635. I enportan pou note ki sipor pou ganny mentenir ziska laz 5an.

Tou sa bann peyman i lo en baz par mwan, eksepte sa peyman ‘*one off*’ pour ‘*Foster Parent*’ e ‘*Expectant Mothers*’, sorti lo zil pros ki pe vin donn nesans Mahe.

Mr Speaker, an total nou’n estimen ki sa revizyon pou kout Gouvernman en sonm preski R31 milyon anplis par an, me prenan kont lekel ki benefisyé avek sa bann azisteman, sa i zistifyab.

Fodre note, ki sa nouvo revizyon dan benefis, i form parti en pli gran travay ki Gouvernman in fer pou reviz bann benefis sosyal, pou asiste nou popilasyon ki vremen dan bezwen.

Nou ava rapel ki en premye ogmantasyon dan benefis ti fer an Me, 2022, kot lasistans benefis sosyal ti ogmant par 32poursan, e ozordi *maximum* lasistans anba sa benefis i R5, 224.

An menm tan, sa program kot Gouvernman ti ‘*top up*’ bann benefis pour pansyoner, dimoun avek en dezabilite e envalidite, ziska en maximum R500 pou kontinyen. Nou ava rapel ki sa program ti konmanse an 2022, ler

Gouvernman ti entrodwir plizyer mezir, pou siport nou popilasyon fer fas avek ogmantasyon dan pri komodite, akoz sa lager ant Ikrenn ek Larisi.

Mr Speaker, touzour Gouvernman pou kontinyen donn sipor sa group ki pli dan bezwen. Gouvernman pe osi fer en provizyon R310.9 milyon pou peyman pour bann ‘*Home Carers*’ anba Lazans ‘*Home Care*’.

13.6 Sekter Kominoter:

Mr Speaker, sa lannen, Prezidan, ansanm avek bann Minis, bann MNAs e travayer kle dan servis piblik ti vizit tou le 26 distrik, kot zot in rankontre zabitan, ekout zot laspirasyon e defi ki zot pe fer fas avek dan zot lavi toulezour e dan zot kominote.

An vi sa konversasyon ki nou’n annan avek zabitan, parey mon’n dir dan mon lentrodiksyon, en priyorite sa Bidze 2024, se pou ede siport lakominote. Apre tou, nou tou nou form par en kominote. E en kominote an bonn sante i reprezant bon vwazinaz, sekirite, e konfor.

Mr Speaker, avek bi pou ed nou kominote nou pe propoz bann depans konm swivan;

- i. R7.5 milyon pou ‘*cater*’ pour bann *Disaster Emergency Works* dan bann distrik
- ii. Renovasyon lakaz dimoun aze dan bann distrik- R3.2 milyon
- iii. Lagrandisman lakaz dimoun aze Anse Royale- R2.1 milyon
- iv. R15 milyon pour en sant rezidansyel Bonne Espoir pour ki bann zenn ki annan problemn konportman— lobzektif sa sant, se fer bann program entervansyon kot move konportman zanfani sanze e zot vin bann adilt responsab ek prodiktiv dan lasosyete.
- v. En *Half-Way Home* pour viktim vyolans domestik - Gouvernman pe negosye pou fer en lesanz propriyete e R2 milyon in ganny met pour serten renovasyon
- vi. En sonm R2 milyon i dan Bidze 2024 pour konmans

- konstriksyon sant 'Day Care' Les Mamelles.
- vii. En sonm R2.5 milyon pe osi ganny mete pour bann renovasyon lo lenfrastriktir bann sant 'day care'.
- viii. Travay lo sistenm semen segonder- R10 milyon – la nou pa zis pe koz lo semen, me drenaz osi e lezot ankor.
- ix. Gouvernman in osi fer en provizyon R1.5 milyon pour nouvo 'bus shelters'.
- x. En sonm R2 milyon pou aste nouvo 'crash barriers' ouswa fer menntenenns lo bann ki egziste.
- xi. En alokasyon R2 milyon pou fer 'disaster mitigation'.
- xii. En sonm R 7.7 milyon pou enstal lalimyer lo semen e
- xiii. En sonm R2.6 milyon pour bann 'travay emergency'

Mr Speaker, sa bann proze ki mon'n fek liste, i separe avek sa alokasyon ki ganny fer avek distrik pour bann pti proze ki ed lakominote.

Pour lannen 2024, en sonm R 26 milyon pe ganny bidzete pour sa bann pti proze dan distrik. Sa sonm i R6 milyon anplis ki an 2023, ki ti R20 milyon. Savedir sak distrik pou ganny R1 milyon, pou depanse lo sa bann pti proze.

Mr Speaker, anplis, byensir i osi annan serten depans ki pli gro ki Gouvernman i bezwen fer, pou siport e fasilite lavi son pep dan lakominote. Alors an 2024, Gouvernman in fer alokasyon pour bann lezot proze konm swivan;

- i. Sant Kominoter Cascade- R5 milyon
- ii. Ladministrasyon Distrik Ile Perseverance- R4 milyon
- iii. Ladministrasyon Distrik Bel Ombre- R3 milyon
- iv. Renovasyon Sant Kominoter Mont Buxton- R1.5 milyon
- v. Renovasyon Sant Kominoter Beau Vallon- R 700,000 e
- vi. Travay lo sistenm desarz Copolia- R4.1 milyon

13.7 Lord ek Lape:

Mr Speaker, pour nou pep viv byen, i bezwen annan lord ek

lape dan son kominote e dan son pei. Lord ek Lape i reste touzour en priyorite, e tou mezir pou dekouraz krim e anpes nou pep al dan en lavi kriminalite, i devret ganny eksplere.

Ler Lalwa pe fer son bout, nou koman Ekzekitiv, nou osi bezwen fer nou bout. Pour lannen prosen, Gouvernman pou investir R62 milyon dan bann diferan proze dan Minister Entern. Enn sa pli gran proze se prizon '*maximum security*' pou separ bann prizonnyen ki'n fer bann lofans pli serye avek bann lezot prizonnyen.

En Bidze R3milyon adisyonnèl in ganny mete pour sa proze an 2024, par lao sa R4.5 milyon ki tin ganny Bidzete an 2023. I osi annan en proze konstriksyon en fasilite pour prizonnyen klasifye koman '*medium e low risk*'- ki pou kout R6 milyon.

Bann lezot proze, i konm swivan;

- i. Sant rimann Ile Perseverance- R1.4 milyon. Sa proze i ekspekte konplete an 2024
- ii. Kontinyasyon konstriksyon Fasilite lo Praslin pour bann zenn ki ti'n

- kondannen- R1.2 milyon
- iii. Renovasyon Kordgard santral- R1milyon
- iv. Konstriksyon Kordgard Perseverance - R5 milyon e
- v. Konstriksyon fasilite '*Marine Police*'- R42.1 milyon

13.8 Sekter Transportasyon:

Mr Speaker, pou fasilit mouvman nou sitwayen, pou permet zot akse diferan kalite servis, zot lakominote, e lemonn, nou bezwen kontinyen fer lenvestisman dan sekter transpor.

An 2024, dezyenm pli gro sonm dan Bidze kapital i dan sekter transpor. En sonm R275.7 milyon ki reprezant 19.3poursan Bidze total lenvestisman proze kapital in ganny bidzete. Sa bann proze mazer i konm swivan;

- i. Stasyon teste veikil lo Praslin- R5 milyon
- ii. Proze semen Was Mahe- R206.9 milyon
- iii. Trwazyenm '*Lane*' Pointe Larue- R7 milyon
- iv. Lagrandisman semen St Louis pou

- al Beau Vallon- R4 milyon
- v. Dezyenm faz proze semen Gran Riviere, Anse Royale- R4 milyon
 - vi. Semen Pasquere Praslin- R3 milyon
 - vii. Semen English River pou Ile Du Port- R2 milyon
 - viii. Lagrandisman semen Ile Du Port pou al ziska kot IOT- R4 milyon e i annan
 - ix. En sonm R50.6 milyon pou resirfas semen lo Mahe e R21.9 milyon pour Praslin ek La Digue – ki fer en total R72.5 milyon

Mr Speaker, nou lenfrastruktir por ek erport i reste sel de fason pour Sesel kontinyen annan akse avek larestan lemonn, alor, zot lenportans dan devlopman pei. i parey Angle i dir ‘*second to none*’.

Plan devlopman lagrandisman por Victoria pe finalize e nou ekspekte ki sa proze i demare boner 2024. An 2023, nou’n war linogirasyon redevlopman por La Digue ki’n kout R33.8 milyon. Bidze in ganny mete an 2024, pour dezyenm faz sa proze demare

avek en nouvo batiman terminal pour pasaze, parey sa enn ki nou’n fer Praslin.

Pou anmenn plis efikasite dan servis, Lotorite Por pou investir dan ankor en remorker e osi de bato pilot, ki asiste bann bato pou antre e sorti dan por.

An Oktob 2023, Lotorite Por ti osi lans zot nouvo sistenm lenformasyon teknolozi (*Port Victoria Management Information System*) lo en baz pilot, pou ed bann partener annan lenformasyon an avans pou kapab fasilite tir marsandiz dan por.

Sa sistenm pou osi fasilite komers rezyonal, avek bi pou redwir kou lavi e benefisye nou popilasyon. Nou ekspekte sa sistenm i vin an mars an Zanvye 2024.

Mr Speaker, kote plan devlopman erport, nou ekspekte finaliz sa plan konpreansiv dan premye kar 2024. Lotorite Lavyasyon Sivil (SCAA) pou osi investir R90.8 milyon dan bann diferan proze pour lannen 2024. Sa i enkli;

- Modernizasyon lekipman telekominikasyon
- servis navigasyon
- ‘*Air Traffic Management*’
- ranplasman sant kontrol ‘*air traffic*’ lo Praslin

- ranplasman bann masin *X-ray* ki servi dan ‘*screening*’ e osi travay renovasyon kot avyon ki fer larout enternasyonal i park.

14. Stratezi Devlopman Nasyonal:

Mr Speaker, an sa ki konsern nou stratezik devlopman nasyonal, avek bann sok eksteryer e sityasyon zeopolitik atraver lemond, i enportan pour nou vin pli rezilyan e prioritize nou bann lobzektif.

Dan sa menm laliny, stratezi devlopman nasyonal i kree sa platform, ki pou ed nou sirmont nou bann defi e i souliny sa 6 pilye priyorite ki nou pe ekspekte met plis lanfaz lo la.

Parey mon’n deza dir avan, sa 6 pilye i konpri:

- (i) En servis piblik modern
- (ii) En nasyon an bonn sante
- (iii) (iv) Promosyon lalwa e lord
- (iv) (v) En sistenm ledikasyon pli modern, ki anlinyen avek nou bann bezwen dan le fitir–
- (v) Soutenabilite lanvironnman e

rezilyan kont sanzman klima e (vi) Azanda Transformasyon Ekonomik

14.1 Transformasyon nou Lekonomi:

Mr Speaker, travay pe kontinyelman ganny fer pou kree en lanvironnman ki pou ankouraz transformasyon e diversifikasyon ekonomik. E ki pou promouvwar valer azoute dan bann sekter kle, pour ki nou ava ganny plis rannman pou soutenir nou devlopman.

Sa stratezi pou transform e diversifye nou lekonomi i enn ki pou a lonterm. Pour sa stratezi reisi, nou pou bezwen bokou lenvestisman, devlopman lenfrastruktir, e pli enportan en sanzman latitud ver nouvo model pou biznes.

Tro souvan, nou’n pri dan bann vye fason fer biznes, e nou pa adapte ou evolye. Dapre sa stratezi diversifikasyon lekonomi, Gouvernman in idantifye bann sekter priyorite:

14.2 Sekter Tourizm:

Sekter *tourism* i reste en sekter kle nou lekonomi e son soutenabilite i konsern nou tou. Plis zefor pou ganny fer pou amelyor leksperyans bann viziter e satisfere lekspektasyon

atraver diversifikasyon bann prodwi.

Bann nouvo aktivite touristik pou kontinyen ganny entrodwir e ankouraze, pou asire ki retonbe ekonomik i pa zis pour lotel me i osi anmenn reveni pour lezot.

I enportan alors pou asire ki sa sekter i egalman annan en lafors travayer performan e kalite.

Mr Speaker, nou pe osi finaliz demars pou antreprann en letid pour pli byen konpran tou laspe sa sekter lo nou lekonomi an zeneral, osi byen ki son potansyel pou maksimiz reveni. Sa letid i ekspekte konplete ver milye 2024 e i ava ede pli byen enform nou bann polisi dan sa sekter kle.

14.3 Sekter Lagrikiltir:

Mr Speaker, sekter lagrikiltir pou bezwen adopte bann teknolozi apropiye pou fasilite komers, amenazman lenformasyon ki a permet bon desizyon ganny fer dan sa sekter.

Nou pou osi travay avek bann prodikter lokal pou adopte teknolozi oubyen sa ki nou apel '*hi tech farming*' ki pou ed nou vin pli rezilyan avek konsekans sanzman klima.

Koman en lankourazman pour bann fermye adopte

teknoloji dan zot biznes, Gouvernman pou reviz fon devlopman pour sekter lagrikiltir.

Pou fer rapel, sa fon devlopman pour sekter lagrikiltir, i annan en to lentere 2.5poursan pour bann *loan* ziska R3 milyon e pour bann *loan* par lao R3 milyon, son to lentere i 5poursan. Repeyman i pour en peryod maksimonm 12an.

Alors Gouvernman in fer en alokasyon R3 milyon dan Bidze e E60 milyon dan bann fon ek *DBS*, ki fer en total R63 milyon pour lannen 2024, pour bann *loan* ki pe target '*hi-tech farming*'.

Nou pou travay ek sa sekter pou fer sir definisyon '*hi tech farming*' i kler e baze lo sa transformasyon ki nou anvi vwar dan sekter lagrikiltir. Sa revi dan fon devlopman pour sekter lagrikiltir pou ganny prezante dan premye parti kar 2024.

Mr Speaker, en alokasyon Bidze R25.6 milyon, pe osi ganny fer pour bann proze dan Sekter Lagrikiltir. Sa i enkli R2.75 milyon pour konstriksiyon e renovasyon semen. R3.5 milyon pe ganny Bidzete pour sistenm irigasyon. En lot proze mazer i konstriksiyon nouvo labatwar.

En Bidze R5 milyon pe ganny fer an 2024. Later in fini ganny idantifye.

Renovasyon Bazar Victoria in demare an 2023 e en alokasyon bidzeter R6.5 milyon in ganny mete pour lannen 2024.

14.4 Sekter Lapes ek Lekonomi Ble:

Mr Speaker, pandan lannen 2023, Gouvernman in met bokou zefor pou konsolid sekter lapas e kontinyen devlop li. Bokou larzan in ganny envesti dan bann fasilite atraver pei e Gouvernman in mentenir son promes pou amelyor kalite lavi nou bann peser.

Sa bann proze por, bazar, *gear store*, pou kontinyen lannen prosenn avek nouvo fasilite modern dan sa bann distrik swivan:

- i. Fasilite Lapes - Anse Aux Pins
- ii. '*Gear Store*' - Grand Anse Praslin
- iii. '*Gear Store*' - Glacis.

Gouvernman pe osi fer en alokasyon R45.9 milyon an 2024 pour devlopman bann lenfrastruktir Ile Du Port, sa i enkli nouvo semen, lenfrastruktir desarz, delo, elektrisite ek telekominikasyon. Ile du Port in ganny demarke

koman en landrwa kot sekter '*fish processing*' pou baze.

Mr Speaker, nou pe osi fer en analiz lo potansyel ki sekter '*live aboard e yachting*' i kapab anmennen pour pei. Sa letid i ekspekte konplete dan premye sis mwan 2024.

En letid osi in konmanse pou travay lo en '*containerised hatchery*' pou siport bann pti biznes lokal dan devlopman akwakiltir. Gouvernman pou osi rod nouvo fason pou devlop e enplimant en stratezi '*marketing*' pour marse prodwi pwason.

Nou pou osi ankouraz bann aktivite lapas soutenab e adopte en model biznes an re-servi '*by-products*' e '*waste*' dan transformasyon pwason, sa ki nou apel '*circular economy*'.

Mr Speaker, lapas endistriyel i enn ki osi anba menas sanzman klima. Lapes an ekse, lapas ilegal e degradasyon bann stok pwason tel ki ton. Fas a sa menas, nou pe travay lo bann mezir kontrol, ki pou ankouraz bann bato ton pou debark zot pwason dan Por Victoria plito ki dan en lot por.

Nou pe osi konsider bann mezir '*licence*' ki pou fors sa bann bato pou desarz sifizaman pwason dan nou por.

Gouvernman i determinen pou protez travay bann

'stevedores' e osi biznes bann Seselwa ki'n investi dan bann fasilite lokalman, par fer sir ki zot pe toultan ganny dekwa pwason pou fer marse zot lizin.

Mr Speaker, sa trwa sektor – tourizm, lagrikiltir ek lapas – zot kle dan sa transformasyon, aköz vizyon Gouvernman, se pou vwar plis tranzaksyon komers antre zot. Sektor lagrikiltir ek lapas, pou bezwen asir prodwi de kalite, lo en baz regilye, ki pou atir sektor touris pou aste lokalman, olye enportan.

Ler sa trwa sektor pe siport kanmarad dan zot devlopman e lagrandisman, nou tou nou pou benefisyè.

14.5 Sektor Lekonomi Nimerik: Mr Speaker, depi 2021, Gouvernman in fer bokou progre pou adopte teknolozi pou fasilite prosedir e fer son servis vin pli aksesib avek manm piblik.

Lenplimantasyon sa stratezi pou kontinyen, me nou pa oule limit sa transformasyon zis dan Gouvernman. Nou oule war adopsyon teknolozi dan Sesel an antye e dan sektor prive osi.

Dan mwayen term, pou annan en lenvestisman enportan ki pou antre dan azanda lekonomi nimerik. Dan

zefor pou fer Gouvernman vin pli efikas, en total R413.7 milyon in ganny bidzete. Sa i enkli;

- provizyon en nouvo Sistenm Lenformasyon Entegre pour Zesyon Finansyel,
- en nouvo Sistenm Zesyon Resours Imen, e
- en nouvo sistenm pour Lazans Proteksyon Sosyal.

Lezot linisyativ ki form parti plandaksyon lekonomi nimerik i reste anmars.

Gouvernman pe osi kontinyen promouvwar lizaz bann platform elektronik dan servis piblik.

- i. Lenplimantasyon Sistenm Lenformasyon Lasante i ekspekte vin anliny ver lafen 2023.
- ii. En nouvo Sistenm Lenformasyon entegre pour Zesyon Fon Piblik (*Integrated Financial Management Information System*) pou al lo tender avan lafen lannen 2023 e nou ekspekte sa sistenm pou vin an

- operasyonnel an 2025 an preparasyon pour Bidze 2026.
- iii. Sistenm Zesyon Resours Imen (*HRMS*) i dan staz *tender*. Nou ekspekte sa sistenm a vin a mars dan preparasyon Bidze 2025. Sa sistenm pou entegre prosedir resours imen avek '*payroll*', i pou osi ed Gouvernman idantifye talan baze lo menazman performans travayer.
- iv. En Sistenm Zesyon Taks modern i dan son staz enplimantasyon avek adopsyon teknolozi, pou ogmant lefikasite Komisyon Reveni e
- v. Nou pou etabli dan en '*Investment portal*' avek bi ki i vin koman en '*one stop platform*' kot investiser ki oule konmans en biznes i kapab akse tou lenformasyon nesese pour fasilite son demars.

Mr Speaker, dan sa demars pour nou devlop lekonomi

nimerik, i annan neseseite pour nou revwar e moderniz nou bann Lalwa. En nouvo Lezislasyon ki annan pour bi protez bann endividi kan zot lenformasyon personnel pe ganny servi dan konteks ofisyel (*Data Protection*), in ganny Gazete.

14.6 Sekter Finansyel:

Mr Speaker, bann risk kont stabilite finansyel pe kontinyelman evolye. Resaman, nou'n vwar ki in annan en logmantasyon dan bann eleman ki sorti an deor laspe ekonomik e finansyel, tel ki '*cyberattacks*', sanzman klima, pandemi *COVID-19* e bann tansyon politik atraver lemonn.

Alor, Sesel i bezwen prioritize devlopman e lenplimantasyon en lankadreman efikas pour stabilite finansyel. Dan sa konteks, enn parmi bann eleman kle i en kad legal pour stabilite finansyel, ki pou annan pour bi formelman etabli en komite, pou siperviz stabilite finansyel dan pei.

Sa kad legal i ekspekte ganny prezante devan byento avek Lasanble Nasyonal.

Amanman dan Lalwa Labank Santral:

Avek bi pou ranforsi lotonomi finansyel e enstitisyonnel Labank Santral, e osi promouvwar latransparans dan son bann loperasyon e fonksyon, Lalwa Labank Santral pou ganny amande pour met li anliny avek bann meyer prensip enternasyonal. Dan sa konteks, Prozedlwa pou amann Lalwa Labank Santral pou ganny prezante devan Lasanble Nasyonal byento.

CSD and RTGS systems:

Mr Speaker, lobzektif Labank Santral pou kontinyen develop marse finansyel e amelyor bann lenfrastruktir finansyel, pou ganny realize atraver akizisyon de nouvo sistenm, ‘*Central Securities Depository*’ ek ‘*Real-Time Gross Settlement*’ ki sipoze vin operasyonnel an 2024. Sa de sistenm modern pou ede ogmant lefikasite e kree plis rezilyans dan marse finansyel domestik.

Mr Speaker, Gouvernman pe kontinyen amelyor son zefor pou anmenn plis progres dan striktir ziridiksyon Anti-Blansisaz Larzan e pou Lit Kont Finansman Terorizm (*AML/CFT*).

An Oktob sa lannen, Komite responsab pou amelyor kordinasyon nasyonal e asire ki

bann defayans ki’n note dan ‘*Mutual Evaluation Report*’ i ganny adrese atan, in soumet en lot rapor avek *ESAAMLG* pou demann amelyorasyon dan ankor 5 *ratings* dan sa 6 defayans ki ti reste.

Zis rekomandasyon 15 ki reste, e nou ekspekte anmenn bann lezislasyon neser pou met sa lankadrem legal pour ‘*Virtual Assets*’ e ‘*Virtual Asset Service Providers*’.

Mr Speaker, parey in anonse, Linyon Eropen in remet Sesel lo ‘*Annex I*’ koni konman ‘*blacklist*’ lalis Linyon Eropen pour bann ziridiksyon ki pa korpore lo taks. Sa i aköz Sesel i annan en *rating* “*Largely Compliant*” dapre standar Lorganizasyon pour Korporasyon Ekonomik ek Devlopman (*OECD*).

Sa desizyon i baze lo bokou demann lenformasyon taks, ki ti konsern en lazans ki ti anrezistre Sesel avan 2018.

Sa lazans ki ti sorti dan ziridiksyon Sesel avek tou rikord bann lakonpanyen ki ti anrezistre avek li, e sa in fer ki *SRC* pa’n kapab soumet lenformasyon, lo okenn demann ki’n ganny fer lo sa bann lakonpanyen.

Toudmenm, Mr Speaker, sa rapor in rekonnet ki Sesel in fer bokou progres, lo met an plas

bann Lezislasyon nesese e osi lo lenplimantasyon sa bann standar. I regretab ki Linyon Eropeen in remet Sesel lo sa lalis apre bokou travay ki Gouvernman in fer lo lankadreman lesanz lenformasyon taks. E osi menm si enn de pei ki manm Linyon Eropeen i annan menm 'rating' ek Sesel.

Malgre sa lenzistis, nou pa pou les sa, anpes nou atenn nou lobzektif pou vin en akter kle dan promosyon latransparans dan sistenm taks, e nou pou kontinyen adres okenn defayans ki egziste.

Nou lentansyon i pour nou demann en dezyenm revi siplemanter avek *OECD* apartir dezyenm kar an 2024.

Mr Speaker, les mwan pran sa lokazyon, pou demann avek Linyon Eropeen pou annan plis lazistis dan zot evalyasyon e tret bann pti leta zil parey zot bann manm. Arete avek sa sistenm de pwa de mezir.

15. Lenvestisman, Lantreprenarya, Lendistri e Fasilitasyon dan Komers :
Mr Speaker, Gouvernman pe kontinyen dan son stratezi pou etidye e analiz diferan mezir pou *facilitate* lanvironnman

biznes dan pei. Nou rekonnent ki i ankor annan travay pou fer dan sa domenn.

Minister Lenvestisman, Lantreprenarya ek Lendistri, i sa Minister ki annan sa manda pou fasilite e amelyor lanvironnman biznes dan pei.

Apard, rezourd en pe bann baryer legal, sa Minister pe osi travay pou ogmant e amelyor standar dan prosedir e servis, ki a pli byen fasilite demars investiser pou ouver zot biznes.

Anliny avek sa vizyon, Mr Speaker, Gouvernman pe al fer li mandatwar pour ki bann lazans konsiltatif, i annan en lalis byen kler bann kondisyon ki en investiser i bezwen satisfere avan ki i ganny en 'licence'.

Nou pou osi egzize ki sa lalis kriter i ganny pibliye lo 'website' sa bann lazans e osi lo *website SIB*. Tro Souvan, nou vwar ki sa lalis kriter pa 'an nwar ek blan' ki fer ki manm piblik i monte desann, e tourn an ron, ki rann zot fristre, e met retar dan zot demars pou konmans zot biznes.

Anplis ki sa lalis Mr Speaker, nou pou egzize ki bann lazans i etablir en dele letan rezonnab, ki pou ganny fer piblik, pour zot donn larepons en kliyan ouswa soumet zot analiz konsernan en

laplikasyon pou en *licence* biznes.

Lide an gro Mr Speaker, se pou senplifye laplikasyon pou en *licence*. Pou fer sa arive, pou bezwen annan sanzman dan serten Lalwa ek regilasyon.

Mr Speaker, ler nou pe reviz Lalwa *Licence*, enn nou priyorite se pou enkli *licence* pour bann nouvo model biznes, ki an se moman sa Lalwa pa fer okenn provizyon pour zot. Parey nou kapab konstate, aktivite biznes pe toultan evolue, e nou kad legal i bezwen li osi evolue e reste a zour avek devlopman.

Vizyon Minister Lenvestisman, Lantreprenarya ek Lendistri, se pou kree en lanvironnman kot ganny en *licence* i vit e efikas. Lanfaz i devret ganny mete lo sa biznes apre ki in ganny *licence*. E sa, Mr Speaker, i pou asire ki standar pe ganny obzerve par sa bann biznes a tou moman.

Pour sa model mars byen Mr Speaker, bann lazans konsernen pou bezwen fer serten lamanman dan zot Lalwa, pour asire ki zot annan pouvwar legal pou pran mezir/aksyon nesese pour garanti standar pe ganny swiv.

Mr Speaker, Bord Lenvestisman Sesel (*SIB*), i reste sa lotorite ki en '*one stop shop*' pour tou investiser dan

pei. Nou pe konstate, ki i annan en persepsyon parmi investiser lokal, ki krwar ki rol sa Bord se pou donn lasistans zis investiser etranze, me sa pa leka, ditou.

Alor, Minister ki sa Bord i tonm anba la, pe al konmans en travay pou revwar son rol ek manda, avek bi, retir okenn konfizyon ki kapab annan, e fer plis piblisite otour servis ek prodwi ki *SIB* i ofer.

Mr Speaker, Labank Devlopman Sesel (*DBS*), i annan en rol tre enportan dan fasilite biznes dan pei, sirtou an sa ki konsern akse avek finansman abordab. Sa lenstitisyon i devret pe kapab evolue pou ed nouvo demann *loan* pour diferan kalite biznes, sirtou bann ki Gouvernman in idantifye koman sekter priyoriter.

Nou santi ki i annan en bezwen pou annan reform dan fason fer sa labank. Lobzektif sa reform se pour;

a. senplifye prosedir laplikasyon pour *loan*

b. asire ki kriter pour *loan* i tre kler, etabli '*key performance indicators*' pour prosedir *loan* e

c. asire ki *loan* pe ganny donner dan bann sekter ki'n ganny idantifye koman priyorite par Gouvernman.

DBS i bezwen asire ki li osi i pe zwe sa rol enportan pou fasilite lanvironnman biznes dan pei.

Mr Speaker, ozordi i annan en kantite lenformasyon ki pou ede fasilite lanvironnman biznes dan Sesel ki '*online*'. Lenplimantasyon nou stratezi lekonomi nimerik, i fer li pli fasil pou investiser akse servis Gouvernman, e sa legzersis pou kontinyen.

Gouvernman pe investir dan lenfrastruktir nimerik pou fasilite laplikasyon *licence* e akse avek servis biznes '*online*'. Lo sa menm laliny, nou pe kontinyen investir pou '*digitalise*' nou bann servis, sirtou kot *SLA*, ek *SRC*, avek bi amelyor leksperyans kliyan.

Mr Speaker, dan nou prosen staz nou devlopman ekonomik, nou pou bezwen enn bann komodite pli presye e pli rar dan Sesel. Sa se later. Nou tou nou kapab apresye ki nou annan en mankman later dan nou pei, sirtou later ki plat.

Alors i lentansyon Gouvernman pou fer reklamasyon anviron 50 ektar later pour sekter endistriyel. Bann travay preparasyon, tel ki letid lenpak lanvironnman, teknik e finansman in fini konmans. Nou a donn plis

detay boner 2024 lo sa bann proze reklamasyon.

En sonm R44.7 milyon pe osi ganny investir par Lotorite Endistriyel. Dan sa sonm R30 milyon i pour devlopman lenfrastruktir lo Zil Eve. E osi R5.2 milyon pour devlopman semen lo *Zone 20*.

En sonm R5 milyon in ganny bidzete pour '*Marine and Auto Industrial Park*'. Pour ki nou pei e nou pep i vremen benefisy e avek tou sa bann mezir ki an plas, ki pou fasilite zot demars, pou vin bann antreprenner, mon pe fer en lapel avek tou bann ki ganny mandate pou fasilite lanvironnman biznes, pour zot zisteman, sanz zot fason fer.

Zot in ganny anploye pou fasilite e siport enn zot frer oubyen ser Seselwa pou konmans en biznes, e non pa pou vin en baryer. Sa lapel pe ganny fer, akoz i ankor tro difisil pou fer biznes dan sa pei. Sa pa kapab kontinyen.

16. Sekter Lanvironnman, Lenerzi e Sanzman Klima:

Mr Speaker, Gouvernman i rekonnèt ki lenpak sanzman klima i annan lenplikasyon lo nou lekonomi, e fodre nou met an plas bann striktir ki pou kapab ed nou reazir vitman lo bann stratezi, lo adaptasyon

sanzman klima. Pou anmenn plis transparans lo evalyasyon bann depans Gouvernman ki ganny fer dan sa sekter, Gouvernman pou entrodwir en sistenm ‘tagging e tracking’ son bann depans ki relye avek sanzman klima.

Sa nouvo sistenm i ekspekte vin an fors Oktob 2024. Pour lannen 2024, nou’n osi konmans enkli bann lenpak sanzman klima dan nou bann dokiman Bidze, espesyalman ‘fiscal risk statement’. Nou pou osi entegre lenpak sanzman klima dan nou lankadremman evalyasyon bann proze lenvestisman.

Sa lentegrasyon i a kapab siport nou zefor, dan nou bann stratezi pou rod finansman dan sa sekter. Mr Speaker, diferan proze pour protez nou lanvironnman pou ganny enplimante an 2024;

- i. Lentegrasyon ‘Marine, Coastal & Terrestrial’ eco-sistenm- R5.9 milyon
- ii. Restorasyon Eco-sistenm lamarin- R17.14 milyon e
- iii. Chemical and Waste (Island Project)- R9.9 milyon

Dan Bidze revize 2023, Gouvernman in osi fer alokasyon R29.3 milyon pour

enplimant plan reabilitasyon lakot Anse Kerlan. Gouvernman in osi fer en alokasyon Bidze R1 milyon e R5 milyon anba ‘SEEREP Incentive Scheme’ e ‘PV Rebate Scheme’ respektivman. Sa de skim pou ganny revwar dan son totalite pou fer li vin pli relevan ozordi.

Mr Speaker, demann pour lenerzi i kontinyelman ogmante e i enportan ki Gouvernman i akseler son demars antraver en tranzisyon pou adopte bann polisi e teknolozi, ki pou promouvwar lutilizasyon lenerzi renouvlab dan sa sekter.

Sa i avek bi redwir depandans lo lenportasyon karbiran, ki osi met presyon lo nivo to lesanz dan lekonomi. An se moman, nou pe resevwar lasistans pou devlop en ‘Integrated Resource Plan’ (IRP) pou sekter lenerzi, ki pou etabli en lapros kordinen dan tranzisyon anver bann sours lenerzi renouvlab.

Sa stratezi i anliny avek langazman ki Gouvernman in fer anba son kontribisyon nasyonal an 2021 pou redwir gaz ki annan en lefe advers lo lanvironnman (Greenhouse Gas) par 26.4poursan avan lannen 2030.

Plizyer revizyon dan Lalwa ki govern sekter lenerzi, in

ganny fer pandan sa bann dernyen mwan, tel ki '*Utilities Regulatory Commission (URC)* e '*Electricity Acts*, ki'n vin anfors.

Mr Speaker, ler nou koz lo lenpak sanzman klima e lenplikasyon ekonomik, nou bezwen osi adres zesyon salte. Gouvernman i rekonnet lenportans pou met an plas bann stratezi, ki pou redwir nivo salte lo *landfill* e promouvwar en '*circular economy*'.

Move zesyon salte i afekte lasante e sekirite piblik e i osi annan move konsekans lo nou lanvironnman. Mr Speaker, fason ki nou zer salte, in fer ki la kantite letan ki nou ti pou kapab servi nou *landfill* Providans in redwir konsiderableman. Sa i en vre konsern prenan kont ki koman en pti leta zil, nou kapasite pou adres sa logmantasyon dan salte i vreman limite.

Dapre en analiz ki'n ganny fer si nou enplimant bann stratezi apropiye, tel ki kraz salte pli byen, nou kapab servi sa *landfill* pour 10an ankor. Plis ki 50poursan salte i salte ki nou kapab fer konpos avek.

Gouvernman i an se moman an diskisyon avek son bann partener enternasyonal, pou prepar en proze pou zisteman amelyor lenfrastruktir

zesyon salte, e entrodwir bann mezir pou amelyor kapasite dan zesyon salte, promouvwar '*circularity*' e osi redwir salte ki pe ariv kot *landfill*.

17. Polisi Taks :

17.1 Revizyon to taks lo *bonus* e bann saler ki ganny peye lo en baz performans anyel:

Mr Speaker, Gouvernman in koz bokou lo plis performans dan travay pour nou lekonomi kapab agrandi plis. Nou osi rekonnet ki i annan bokou anplwayer ki pe donn '*bonus*' ouswa lezot saler zot travayer baze lo performans.

Ozordi sa '*bonus*' i ganny takse anba dezyenm '*Schedule*' Lalwa pour Taks lo saler ek Benefis Non-Monneteer. Zis lavaler lapey en mwan sa travayer ki ganny egzanpte e okenn '*bonus*' adisyonnell lo sa en mwan lapey, i ganny takse baze lo nou sistenm taks lo saler lo en baz progresiv. Nou war sa sistenm i pa zis pour motiv travayer pou travay pli dir.

Alors, Gouvernman pou anmenn en nouvo sistenm taks lo '*bonus*' e bann saler ki ganny peye lo en baz performans anyel, konmansman le premye Zanvye 2024, konm swivan;

1. La valer lapey en mwan

sa travayer pour napa taks lo la.

2. Okenn '*bonus*' an plis ziska 15poursan saler anyel sa travayer, pou ganny takse lo en to 15poursan

3. Okenn '*bonus*' an plis lo sa 15poursan saler anyel pour ganny takse lo en to 20 poursan

Mr Speaker, permet mwan pou donn enn de legzanp; -

En travayer ki pe ganny en saler R10,000 e pe ganny trwa mwan saler lavaler R30,000 pour son performans, ozordi sa travayer pe pey R 4,000 taks lo sa *bonus*. Avek nouvo sistenm taks, sa travayer pour pey selman SR 3,100.00. Alors en benefis SR 900

En travayer ki pe ganny en saler SR 25,000 e pe ganny de mwan saler lavaler R50,000 pour son performans, ozordi sa travayer pe pey R5,000 taks lo sa *bonus*. Avek nouvo propozisyon, sa travayer pou pey selman R3,750 taks. Alors en benefis R 1,250.

Sepandan, bann travayer ki annan en saler par anba SR 8,555.50, nou pou fer sir ki okenn egzanspsyon ki zot pe gannyen ozordi baze lo sistenm taks progresiv, avek sa paramet egzanspsyon R 8,555.50, i reste.

17.2 Egzanpsyon Pansyon volonter ki anplwayer i

kontribye pour son travayer anba Katriyenm '*Schedule*' Lalwa pour Taks lo Saler ek Benefis Non-Monneter:

Mr Speaker, zot ava rapel pli boner dan mon diskour, mon ti dir ki nou pou bezwen R868.4 milyon an 2024 dan Bidze nasyon, pou pey zis benefis retrait, bann dimoun ki'n pran zot retrait.

Mr Speaker, sa kou i enn ki enorm. Gouvernman pe eksplor diferan fason pou ankouraz e siport bann ki pe planifye zot retrait, par investir dan zot prop retrait. I enportan ki nou seryezman konmans sa konversasyon. Anfet sa i en konversasyon ki nou ti'n devret konmanse byen lontan.

Alors, avek bi ankouraze ki nou pep i benefisye avek diferan opsyon peyman ler zot in ariv laz retrait, Gouvernman pe anons en serten poursantaz egzanspsyon taks lo pansyon volonter ki anplwayer i kontribye pour son travayer.

Mr Speaker, i annan anplwayer dan sekter prive, ki pe investir dan pansyon prive ouswa kot Fon Pansyon pour zot travayer. E bann anplwaye i benefisye en pansyon adisyonnal kan zot pran zot retrait. Ozordi, i annan en taks 15poursan ki sa anplwayer i bezwen peye lo sa benefis ki i

kontribye lo sa pansyon pour son travayer.

Alors, nou pou anmenn katriyenm ‘*schedule*’ nou pou amann katriyenm ‘*schedule*’ Lalwa Taks pour saler ek benefis non monneter pou retir sa to taks 15poursan lo kontribisyon anver pansyon retrait, ki anplwayer i kontribye pour son travayer.

Fon Pansyon osi pe travay lo bann nouvo striktir, ki sa travayer i kapab servi sa bann kontribisyon volonter pour bann garanti dan lefitir.

Sa egzansyon pour aplikab ziska 8poursan saler sa travayer. Alors mon fer en lapel, avek sa egzansyon, pour plis anplwayer partisip dan sa ‘*match-it*’ skim ki Fon Pansyon i annan. Mon osi ankouraz bann travayer, pou kontribye plis dan zot kontribisyon volonter.

17.3 5an Adisyonnèl pour bann lakonpanyen prodiksyon Lenerzi Renouvlab an term ‘*loss carry forward*’:

Mr Speaker, Sesel i bezwen plis lenvestisman dan bann proze lenerzi renouvlab. E nou konstate ki Gouvènmàn pou bezwen antre plis dan bann partenarya piblik prive, an vi kou sa bann lenvestisman dan sa sekter.

Anba Lalwa Taks biznes, en lakonpanyen i *kapab ‘carry forward losses’* pour selman 5an. Alors, pou ankouraz plis sa bann lenvestisman par sekter prive, dan sekter prodiksyon lenerzi renouvlab, nou pou met 5an adisyonnèl pour sa bann lakonpanyen *kapab ‘carry forward losses’*. Sa i a vin en total 10 an.

17.4 Entrodwir taks ‘*holiday*’ pour senk an pour bann nouvo biznes dan sekter priyoter:

Mr Speaker, nou’n koz bokou lo transformasyon e diversifikasyon nou lekonomi. Pour lannen 2024, Gouvènmàn pou entrodwir en taks ‘*holiday*’ pour 5an, pour bann nouvo biznes dan sekter priyoter parey dan lekonomi ble, lekonomi nimerik e osi prodiksyon plis prodwi pour redwir lenportasyon e ankouraz plis eksportasyon. Sa i ava en motivasyon pour bann endividi envestir plis dan sa bann sekter.

17.5 Ogmantasyon dan dediksyon depans en biznes i kapab fer anba Lalwa Taks Biznes par bann donasyon ki zot fer pour benefisye bann program ou proze kominoter:

Mr Speaker, ozordi anba senkyenm ‘*schedule*’ Lalwa

Taks Biznes, en biznes i kapab dedwir 100poursan son donasyon ki i fer pour bann proze e programm kominoter baze lo bann prosedir dapre Lalwa.

I annan bokou biznes ki anvi travay konzwentman avek Gouvernman pour bann proze dan zot distrik, ouswa bann programm dan zot kominote parey bann programm sportif.

Alors pou ankouraz sa bann zes saritab sorti kot bann biznes, Gouvernman pe ogmant sa to pour ariv 150poursan.

Sa i vedir ki sa bann biznes ki fer sa bann donasyon pour bann proze e programm dan kominote, ouswa bann lasistans ki zot fer pour bann proze e programm lasosyete sivil, 150poursan sa donasyon i kapab ganny dedwir lo zot 'assessable income' pour taks.

Sa biznes pour kapab fer sa bann donasyon ziska en sonm ki pa redwir zot profi dan negatif.

17.6 Retir sarz ki bann 'booking platforms' i sarz konmisyon lo VAT:

Mr Speaker, nou ti met en provizyon ki pa ti permet bann 'booking platforms' sarz 'commission' lo sa 'Tourism Environmental Sustainability Levy' an vi ki bann letablisman

ki pe kolekte sa *levy*. Alors, Gouvernman pou revwar Lalwa VAT, e asire ki nou enkli en provizyon dan Lalwa ki pou anpes okenn sa bann 'booking platforms' sarz en 'commission' lo sa VAT.

17.7 Taks lo veikil ek pyes:

Mr Speaker, apartir le 1 Zanvye 2024 taks e 'levy' lanvironnman lo serten veikil e pyes, pou ganny redwir. Apre plizyer konsiltasyon, Gouvernman pou redwir 'Excise' taks avek 'levy' lanvironnman lo bann *pick-up Twin Cab*.

Sa rediksyon i espekte ede fer ki *pick-up Twin Cab* i vin pli abordab pour biznes lokal tel ki bann pti e mwayenn antrepriz ki servi sa kalite transpor pour zot tranzaksyon komersyal.

E osi anliny avek proteksyon lanvironnman, Gouvernman pou redwir 'Excise' taks avek 'levy' lanvironnman ki aplikab lo serten veikil, ki servi batri pour transportasyon imen. I enportan note ki sa rediksyon lo bann veikil 'hybrid' ki servi batri avek en kapasite 200 voltaz ou plis, lo bann 'plug-in hybrid' e osi lo bann transpor ki antyerman servi batri.

Sa rediksyon i annan bi pou ankouraz konsonmater

pou servi plis veikil ki anmenn benefis pozitiv pour lanvironnman.

I enportan note ki ‘*Excise*’ taks lo “*quarter panel*” nef pour transpor pou osi ganny redwir. Me, Gouvernman pe mentenir ‘*Excise*’ taks ki aplikab lo lenportasyon bann “*quarter panel*” dezyenmmen. Sa mezir ava fer “*quarter panel*” nef vin pli abordab e ankouraz konsonmater pou servi “*quarter panel*” nef ki dapre bann akter dan sa lendistri i pli an sekirite.

18. Skim Finansyel pour bann biznes:

18.1 Skim pour sibvansyonn to lentere lo bann *loan* pour bann pti e mwayen biznes:

Mr Speaker, parey mon ti anonse dan Bidze 2023, Gouvernman in fer en revi lo skim *loan* ‘*Small and Medium Enterprise*’ (*SME*) dan bann sekter kle, ki pou ede dan sa transformasyon ekonomik.

Bann biznes dan sa bann sekter kle ki annan en reveni R10 milyon ou mwens, i kapab kalifye avek en *loan* maksimonm R3 milyon e repeyman pandan 10 an. To lentere pour sa premye R1 milyon i 5poursan e sa dezyenm 2 milyon lo sa maksimonm *loan* R3 milyon i 7 poursan. Alors, Gouvernman i sibvansyonn sa

to lentere ki bann labank i sarze.

Avek bokou diskisyon avek sekter prive e bann labank, Gouvernman pou enkli bann *loan* ki bann biznes i pran pour konstrir proze lakaz abordab, e lagrandisman bann proze ki egziste dan sekter tourizm anba sa *SME* skim. Sa kategori pour annan en peryod gras 12 mwan, konpare avek bann lezot kategori ki sa peryod i 6 mwan.

Gouvernman in fer en alokasyon R50 milyon pou siport skim pour sibvansyonn to lentere lo bann *loan* pour bann pti e mwayen biznes.

18.2 Skim ‘*seed capital grant*:’

Mr Speaker, dan Bidze 2023, R5 milyon in ganny prevwar pour skim ‘*seed capital grant*’. Sa i en don ziska R 200,000 pour finansman bann pti ‘*start-up*’ lantrepriz, pou asiste zot dan bann premye faz zot devlopman. Sa skim i ganny administre par Lazans Lantrepriz Sesel (*ESA*).

19. Konklizyon:

Mr Speaker, an konklizyon, sa Bidze 2024 pe met bokou lanfaz dan lenvestisman dan nou pei, e dan nou pep. Nou pe investir dan lakominote, pou fasilite lavi nou pep. Nou pe investir dan

lenfrastruktir, sirtou sportif, avek bi motiv nou pep pou angaz zot dan bann aktivite sportif, pou gard zot an bonn sante.

Nou pe investir dan bann lenfrastruktir, ki pour tro bokou lannen in ganny neglize. Nou pe investir dan bann diferan benefis sosyal pour donn sipor nou pep ki bezwen sa lasistans adisyonnèl. Nou pe investir pour fasilite lanvironnman biznes pour ed sektè prive pou agrandi nou lekonomi. San en sektè prive ki pe fleri, nou lekonomi pa pou devlope e Gouvernman pa pou kolekte reveni, pou founi servis son pep.

Nou pe investir dan nou lazènes, par met a zot dispozisyon plizyèr program, servis ek loportinite pour zot epanouir.

Mr Speaker, dan sa Bidze i annan en benefis pour tou dimoun. Gouvernman pe reisir distribye larises ki nou pei e nou pep i zenere, gras a en sistenm fiskal e monneter byen responsab.

Sa Gouvernman i enn ki pe travay tre dir pou amelyor sityasyon son sitwayen, par kree loportinite pour zot leve e debourye. Ler, nou'n fer byen, nou *'give back'*, me nou pou toultan reste responsab, e

pridan dan nou depans, akòz Sesel i vremen vilnerab avek bann sok eksteryer.

Avek Sa, Mr Speaker, mon rekomandè ki sa, "*Appropriation Bill, 2024*" pour en Bidze R10,640,628,966 pou otoriz depans dan '*Consolidated Fund* pou 2024 i ganny aprouve.' Mersi Mr Speaker.

(APPLAUSE)

MR SPEAKER

Mersi Minis Hassan pou prezantasyon Bidze 2024. Mon krwar avek sa prezantasyon Minis in depoz dan Lasanble plan Gouvernman pou ladministrasyon e devlopman lavi nasyonal, lekonomi, finans e tou sektè ki konsèrn lavi piblik.

Mon rapel bann Manm ki travay ki devan nou se repons lo Ladres Bidze. Alor dan zot preparasyon, mon envit zot pou konsantre lo sa ki annan dan Bidze e met konsèrn e defi ki devan lepep Seselwa o sant zot ladres.

Mon osi envit zot pou rapel alokasyon letan ki nou donnen e sa i 45 minit pou bann *Leaders*, ki komans repons e apre 30 minit pou sak Manm.

Mon prezant remersiman pou Minis avek son delegasyon pou partisipasyon ozordi avek

nou, e mon konnen zot pou
avek nou pou en bon pe letan
dan sa mwan ki vini devan nou.
E mon swet zot bon depar pou
ozordi.

Lasanble pou *adjourn* e
pou repran travay 9er bomaten
Merkredi le 8 Novanm. Mersi.
Adjourn.

(ADJOURNMENT)